

十六國宮詞序

原夫江南七弄豔體偏工河滿一聲綺章漸起芙蓉掌上傳
禁掖之舊聞花藥宮中述成都之韻事棲遲旅邸津陽詩咏
鄭嵎倚徙離宮連昌詞成元相楊皇后頌揚當代雲中瞻華
蓋之臨周憲王感慨前朝月下發金梁之唱宮詞之作由來
尚矣吾鄉周蓉初比部浮磬毓英懸鈴應瑞琅玕披腹門無
題鳳之寶珠玉爲心案有獻鸚之賦學早窮夫二酉名久壓
乎雙丁至其手判雲司口宣天憲經義斷獄董江都不媿純
儒古法決疑兒內史斯稱樸學乃當案牘勞形之際不廢經
綸秘律之章近梓十六國宮詞一百二十首皆君退食餘閒
之所製也慨自蒼鷺疊起銅駝泣深江東則紫蓋黃旗衣冠

十六國宮詞序

一

都雅河朔則旃廬毳幕戎馬憑陵漳水申祈草付協豹祠之
兆龍門虔祀呼延徵魚躍之祥大都豪傑之挺生多藉閨闈
而發跡嗣是才標聰慧娥英旣並蒂舒華性鄙凡庸垂德亦
二喬競秀中宮列坐頌鳳詔于層臺永巷陳規輟鷓儀之新
殿方謂瓊簫玉笛幸奏昇平錦帳銀屏長承寵眷然而櫻桃
歌歇棘子成林葵菜夢醒蒲家不祀浣紅粧而禮佛珠墜樓
前被素鎧以尋仇弓彎陣上傷心血又何須金寶爲齋駐足
酒泉詎向瓊裘作鬼陳之簡牘堪補季龍女史之書播入風
謠非徒鉅鹿公主之曲今者滑臺離石燁管久彫鮮卑單于
壺儀就佚君披房喬之載記參崔氏之春秋搜燕錄石傳之
殘編擗涼記秦書之斷簡供獮祭者數十餘種發鸞吟者三

千餘言集千腋以成裘曾無襲積釀百花而作蜜莫辨芬馨
運腕驅雲鏤心噴雪雖僞朝之軼事猶正始之遺音何必緣
篋赫蹄刺椒塗之燕尾絳紗繫臂摹竹戶之羊車續命琵琶
小憐粉鏡衣塵皂莢并辱膳脂方靡濫于鉛華足流連于綈
墨者哉僕枕莊功疎推敲技拙雅望曾聯于班案嘉貺幸挹
乎江花秦市購以千金蕭齋珍其一部置仲初于下座誰日
非宜援禹玉以運鑣咸稱允當紹元晏賦都之敘驥附增慚
仿子雲篆刻之文蟲雕滋慙云爾丁酉五月旣望姻世弟邵
鳳依序

序

同年蓉初以所作十六國宮詞見示曾亮因爲之言曰夫宮詞者必擇其事之貴麗詞之清美以成其要眇哀怨之音工詩如蓉初者非所難也而於十六國則甚難自晉失其政五胡迭興兵相蹈藉拓跋氏建國而北朝之名始定於一劉石慕容苻秦諸國興滅雖暴皆壤長地進大半天下其餘或不過數郡縣之地竊名字十餘年之間而符瑞震耀炎炎赫赫與三代赤烏白魚無以異及成就基業乃至微淺本末不相應蓋其始特取便一切如田單神師吳廣效狐鳴之謀而爲之羽翼者樂附會之誇神述天以自文其公麼而已甚矣史臣之無識也然方其克一脆敵據一敝州莫不窮極姦酷剝

十六國宮詞序

民命而饗兵威出死力以爭之百敗而不挫亦如秦漢之君貽子孫帝王萬世之業也其得之艱難也旣如此而其入又皆人頭畜鳴人肝爲羞人血爲飴極天下之物無可以勝其暴者而不能不牽於靡曼之好極情縱欲喪其所力征經營者而不悔嗟夫鬼妾怨耦挈首墨面於樵斧刀鋸之餘而優笑於熊咆鯨吐之側讀史者見其事悲其人率掉慄不忍視非博覽而精識之安能萃其英華而合於歌咏者乎昔賢能背誦班史隱僻處以爲美談况轡觸之區六漠重氛之際讀其詩與連昌宮津陽門諸作者相上下不其難哉不其難哉然則文人之力固無所不可者吾以是知苻生之極惡石勒之闇解漢書史臣緣飾之蓋誕而不足信也戊戌秋七月同

年弟上元梅會亮序

十六國宮詞序

二

序

周蓉初比部學富百城才充九庫夙擅南金之譽能搜東壁之奇旣濟美於櫨梨更聯芳於杞梓韓陵一片石差足抗衡劉洞五言城遙相伯仲近以所作十六國宮詞見示取百三十年戰爭之運成百二十首清麗之辭文獻不足尙能徵古人復生未肯讓江濤八月其筆不從人間來河滿一聲此曲祇應天上有原夫八王啟禍五胡代興當牛繼馬之先有虎逐羊之勢江統之憂諸并部諫也不行郭欽之慮及盟津謀適不用言猶在耳戎已生心其後稱趙者二稱秦者三稱燕者四稱涼者五暨岷蜀之負固與赫連之逞兇莫不爲縱爲橫忽起忽滅方其盛也則擣聲紫色八面獸心致五星之互

十六國宮詞序

一

經如三日之並出屈至尊以執蓋役故帝以行觴金刀赤璽之符寶鼎彳珪之瑞指雞爲鳳祝虬成龍將謂化可及於五千基遂傳於八百矣無何而淵海光之業盡臣又土之運衰鳳著鎖而難留燕作巢而旋墮匏瓜星動蔥韭日生或見滅於其臣或見併於其敵譬如逐鹿不知幾人爲帝王試與瞻烏竟是誰家之天下此又稱之不足稱數之不足數者也然而盜亦有道天非不仁凡邦國之廢興由官闈之治忽手疏而救廷尉內輔奚慙足智而斬閹人芳徽永著諺傳李尹佐經略於州中誓立薛閭供掃灑於地下無心至此見我猶憐用寶何爲逼人太甚書裙置酒豐妻赴節之年跨馬彎弓登后仰天之日固足誌佩環之義烈表巾幗之英雄至若溺於

燕私安於鳩毒開四時之浴室引千騎之羽儀皇后有左右
之稱貴人有大小之目渾太后之預朝政宋夫人之擅國權
盜鑰有謀變生近侍開門不及淚滴重泉三美同亡意空悲
夫龍雀一雌纔入禍已兆夫魚羊追懷於司馬家兒故宮安
在載考於季龍女史軼事仍多斯有益於勸懲兼可資於採
擇惟是酉山鮮到丙部難搜慕容垂之曲誰箋蕭方等之書
不錄漢記趙記久已闕遺秦書涼書胥歸散佚雖僅存者有
唐太宗之載記而略備者惟魏崔氏之春秋然或鄴架未收
李樓罕貯時謂不如意事疇謂所未見書君乃掇其菁華播
爲歌詠旣麗以則亦正而葩例以關雎四始之遺音比諸都
京五經之鼓吹從此先覩爲快佇看馬市之傳鈔倘教待價
而沽定有雞林之來購僕業荒邊管學遜董帷昔濫廁於春
華垂青已久今聯曹於秋憲懷白彌深暇則邀杜甫以論文
疑則造揚雄而問字貝斯傑構如游宛委山中聽罷新聲恍
到廣寒宮裏願書萬本誦萬遍當以一字易一縑擬豹窺而
未許已焉哉謂之何哉謀驥附而無從觀止矣蔑以加矣道
光十有九年嘉平月下濬世愚弟吉林奎耀序

序

在昔金行失馭馬繼以牛赤縣交訐鼠變爲虎蒼鳧出海誰
牽帝子之衣白鹿在原隱扈天王之駕河洛之北乘石交登
殺潼以西膺圖並起初基締造非無閭閻贊襄末嗣荒耽亦
有宮幃婉變綜其軼事足備瑤臺璇室之箴譜入新詞如聞
銀漢金梯之曲蓉初比部游心綈素託意管彤偶攄宋玉之
微辭間效徐陵之豔體金支曉建桂華賡安世之歌玉佩晏
鳴苻菜發關雎之歎爰踵彥鸞直筆用敷文鸞妍辭覽彼貞
淫喻茲美刺矣爾乃月光入戶鷓儀頓失良規沙石徵歌鳳
首能調綺曲石季龍宴游金殿魂消一樹櫻桃苻文玉酣寢
紫宮夢逐雙飛蚊蝶和龍城北豔妻則病問生魚銅雀臺南
美女則驕乘駿馬甚至鳩摩羅什留法種於長安罽賓沙門
衍秘傳於鄯善牆茨莫掃地棘方生然而危邦亦有貞姬僞
嬖尙餘淑媛毛氏之綺衣躍馬氣奪姚萇慕容則綠字書裙
心傷餘熾聞雞暗警春花落五將之山蓐蟻前驅秋草迷二
如之塚楊皇后殉君幽壤寶璽先焚張美人繡佛空門明珠
竟碎鸞鳴梟隊蘭秀艾叢特筆闡揚令人興感作者其有意
乎說者謂三秦恣肆二趙奢華致神州之陸沉何天帝之此
醉不知景謀代魏戕仇儷於同衾武侈平吳納姪娥於別館
業旣成於攘敝政更墮於淫荒民罔常懷天厭否德豕蛇薦
食司馬家之厄運重逢鶯燕驚飛華林園之豔粧四散酒吞
金屑貴主淪入民家火繞翟衣孽后歸於仇敵十六國之迭

起固天之所以報晉也十六國之無成乃德之不足以代晉也獨是紅埃落落不逢綠羽之仙青史茫茫誰下金人之淚茲乃和田陳籍高段遺編斷玉零璣殘膏賸粉靡不窮年蒐討逐字爬梳昔時王建摘詞後代資爲故實今者周瑜顧曲平生博極羣書亦可謂香閣之餘閒雲樓之勝事已僕廿年螢燭媿乏佳篇一卷烏絲珍爲祕玩擬須昌學士能言唐代宮儀勝花蕊夫人止說蜀王故事忝同襟抱屬冠弁言作宮闈之箴規備方隅之考訂此日叢書採出知爲崔氏功臣他年重譯繙來再讀高齋逸史

君撰瀛壖金鑑尚未行世

道光庚子春正月

友石愚弟宗金樹拜題於皋城之隱玉精舍

序

西瞽寮友周君蓉初作十六國宮詞一百二十首復爲之注兼徵本事凡若干條詞麗以則藻飾葩流建珪邊響此其厚音遐稽典午移晷豎亥失步蜀廬毳幕紫色蠅聲詳諸載記史例嚴矣慨夫竊鈞瓜分改玉棘翦日精石符星芒燦角鴟張播于鷄殿燕昵誚于雞晨女孽兆夫龍釐陰駭溢夫魚貫襲彼荒宴之蹟祇傳淫濫之音刻葉泝流蒙竊惑焉或者庭楹沈昏宮掖婉變閨生邦媛允稱內輔庶追姜后脫珥之風眇合班姬辭輦之義以視玉樹後庭之曲瓊華別苑之志豈其媿慙合范薰猶同器者與若迺徵刈蘭之夢續焚椒之錄撥拾佚聞羅網逸事漸導六代之哇聲接踵五胡之靡習洵

十六國宮詞序

一

論世之委波亦讀史之跋燭也蓉初幼學勵志殫見洽聞刻羽叩桐發爲訶詠予呂強圉之歲適館紫琅傾蓋盍簪相得益彰時與證扶海之洲訪寶王之墓饌箸暇日嗜古勗期異日呂承明大雅之才守名山傳信之業庶幾上副右文操斯左券云爾庚子正月八日鶴山馮啓綦序

十六國宮詞目錄

卷上六十首

前趙十首

後趙二十首

前燕十首

前秦十四首

後燕六首

卷下六十首

後秦八首

南燕六首

夏六首

前涼八首

蜀四首

後涼六首

西秦六首

南涼四首

西涼四首

北涼四首

北燕四首

十六國宮詞凡例

一宮詞之作權輿關雎唐宋已來代有佳什若其連篇綴玉累牘貫珠王建王珪斯稱盛軌

國朝雲間吳泉之

省蘭

先生撰十國宮詞一百首風華密麗

媲美二王其自註本事于古有之未可訾議第十國事蹟雖有江南野史吳越備史三楚新錄蜀檣杙諸書之纂記固不如吳任臣十國春秋貫穿該括乃其註內所引本事于十國春秋及諸書互見者多列諸書名目以掩十國春秋若以春秋後出爲不足據而註所徵用正復不少又未能悉從始見之書然則其或取或舍殊無義例無乃雜舉以炫博乎鄙意于此竊有未慊故作十六國宮詞一百二十首并繫以註非

十六國宮詞凡例

與吳詩絜長乃爲吳註矯枉閔者諒諸

一

一魏崔鴻撰十六國春秋一百卷自崇文總目已不著錄今所行明鈔大字本卷數符合乃嘉禾屠伯子出先世所藏授梓以傳者以諸書參考之通鑑考異晉永嘉三年龐淳降漢條下引十六國春秋五月淵遣聰攻壺關敗韓述黃肅六月晉遣王廣等來討七月戰于長平晉師敗劉惔以壺關降復斷之曰劉琨集事在四月前當依琨集爲定又晉太和四年王猛伐燕攻洛陽條下引十六國春秋十一月王猛伐燕遺慕容紀書紀請降十二月猛受降而歸復斷之曰燕書少帝紀建熙十年王猛攻洛明年正月拔洛當從燕書案今本十六國春秋王廣作王曠劉惔作龐淳慕容紀作慕容筑又韓

述等之敗麗淳之降俱在漢河瑞元年四月王猛之攻洛在燕建熙十年慕容筑之降猛在次年正月轉似依劉琨集燕書而改又太平御覽偏霸部劉驥下引十六國春秋自石虎寇河東戰敗至曜攻金墉被擒皆在光初十一年今本作光初十三年然考涑水編年光初年號實盡十二不應有十三年又御覽時序部引十六國春秋諸州自建武元年至十二年不雨雪金斤直米二升今本無之又無表與史通不合無贊無序與魏書鴻傳不合此其可疑者也然表贊序文之脫漏或由于穴鼠壁魚姓名年月之參差有類乎妃豨帝虎其餘則證以南北諸史所載唐宋類書所引多相吻合且以晉宋年號紀年與史通亦合此其可信者也十六國至今垂二千年其政治否臧之迹典章因革之規以及園囿之遊觀宮幃之嘖笑晉書載記既不殫詳魏書列傳尤爲簡略獨是書洪纖畢舉本末兼賅縱使疑信互存猶不忍棄況疑者不及十之一信者且居十之九乎今徵引故實大半以十六國春秋爲宗凡諸書與十六國春秋同載者概註十六國春秋重專書也

一何鐘漢魏叢書中載十六國春秋十六卷每一國爲一卷止紀國主不載諸臣較本書事跡不過稍存端末蓋卽崇文總目所謂十六國春秋略通鑑考異所謂十六國春秋鈔也今引用石勒薨于西閣一條餘如慕容暉后可足渾氏之作可朱渾南涼高昌殿之作昌高殿與本書互異者概不之從

一十六國割據方隅各有記載其見于隋志唐志者有常璩漢之書十卷蜀李書九卷田融趙書十卷舊唐書作趙石記二十卷王度

二石傳二卷舊唐書作二石記二十卷不著名又二石僞事二卷舊唐書作六卷范

亨燕書二十卷張詮南燕錄五卷王景暉南燕錄六卷遊覽

先生南燕書七卷南燕起居注一卷高閭燕志十卷何仲熙

秦書八卷姚和都秦記十卷張諮涼記八卷舊唐書作十卷劉景燉

煌寶錄十卷太平御覽作劉炳蓋唐祖諱改景也又涼書十卷晉喻歸西河

記二卷舊唐書作段龜龍悞段龜龍涼記太平御覽作涼州記十卷高道讓涼書

十卷沮渠國史涼書十卷無名氏拓跋涼記十卷和苞漢趙

記十卷其見于太平御覽書目者有鄴城故事車頻秦書裴

景仁前秦記後秦記吳篤趙書陸翱新中記石季龍別傳諸

十六國書詞凡例

書南宋以來漸就散佚今無復存者然北堂書鈔藝文類聚

初學記太平御覽寰宇記說郛諸書中尙載有數百條間嘗

摘出成十六國霸史補逸四弓懼有遺漏未敢遽付梨棗今

詩內援引數十條其事其文多十六國春秋所未載或亦載

十六國春秋而大同小異者必註明所以折衷從長之故以

備參考

一十六國廟社雖移幅員可攷圖經所誌故實間存遠自酈

道元水經注李吉甫元和郡縣志樂史太平寰宇記歐陽忞

輿地廣記明一統志曹學佺名勝志諸書近及西北各省府

州縣志廣加蒐討所得遺聞軼事在彥鸞書外者類多掇入

篇章然如水經注載趙建武中永貴侯張余上金馬一匹于

篇

泰山元和郡縣志載苻堅造車于文車澤周地圖記載姚萇時黃梁谷湫神移徙借人車牛名勝志載石勒祀黃攀神于馬戶山之類事雖新奇辭難附麗則姑置之

一註詩有本事有古事楊鐵厓詠史樂府兼詳古事尤西堂明史樂府祇徵本事今仿西堂樂府例凡借用古典概不詳釋

大清道光十二年歲次壬辰嘉平月下澣南通州周昇識于都門櫻西書屋

十六國宮詞卷上

南通州周 昇菴初撰

并註



前趙

劉淵據離石僭號稱漢尋徙蒲子復徙并州傳子
和弟聰弑而代之傳子粲偽司空靳準弑而代之
淵族子曜誅準即位徙長安改國號曰趙
與石勒戰敗被執子熙奔上邦石勒滅之

旭日曠曠瑞彩濃白魚雙角欲成龍赤毫表出名王相從此
汾城號秀容

崔鴻十六國春秋前趙錄劉淵傳劉豹淵父也豹妻呼延

氏祈子于龍門有一白魚頂有一角晉書載記作二角今參用之軒髻

躍鱗至于祭所久之乃去其夜夢所見魚變爲人左手持

一物大如雞子光景非常授呼延氏曰此是日精服之生

貴子寤以告豹豹曰吉徵也自是五月而生淵及長當

心有赤毫毛三根長三尺六寸襄陵公師或等見淵驚曰

此人形貌非常吾所未見也樂史太平寰宇記秀容城

卽漢汾陽縣城劉元海所築元海因感神而生姿容秀美

故自曰其城

五部風雲應會昌靈蛇翊運築平陽大于共締中興業玉璽

騰波耀海光

十六國春秋前趙錄劉淵傳豹卒淵代爲左部帥五部豪

傑無不歸之寰宇記臨汾縣有劉元海城晉永嘉之亂

元海僭稱漢于此置都築平陽城晝夜興作不久則崩募

能城者賞之先有韓媪者于野田見巨卵傍有嬰兒收養

之字曰樞兒時已四歲聞元海築城不就乃白媪曰我能

之字曰樞兒時已四歲聞元海築城不就乃白媪曰我能

城之母其應募媼從之概兒乃變爲蛇令媼持灰隨後遺誌焉謂媼曰憑灰築城可立矣竟如所言元海問其故概兒遽化爲蛇投入山穴露尾數寸仍掘其穴忽有泉湧出激溜奔注與晉水合流東入于汾至今近泉出蛇皆無尾以爲靈異因立祠焉 又大于城在文水縣西南十一里

本劉元海築令兄延年守之國人語長兄爲大于因以爲名 十六國春秋前趙錄劉淵傳太安中惠帝失御淵從

祖宣曰復呼韓邪之業此其時矣 又汾水中得玉璽高一寸二分方四寸文曰有新保之蓋王莽時物也得者因

增淵海光三字而獻之淵以爲己瑞乃大赦境內改元河

瑞 太平御覽引吳篤趙書曰劉聰徙治平陽于汾水中得瑞白玉高四寸二分龍鈕文曰有新保之與此異昇案平

十六國書詞卷上 前趙

二

陽實徙于淵時聰未嘗徙也宜從十六國春秋爲優

鹿蠡矯矯擅英才早日單 音蟬 于已建臺慈母恩深求淑女紅

絲牽向外交來

十六國春秋前趙錄劉聰傳聰形體非常究通經書百家

之言孫吳兵法靡不誦之工草隸書尤善屬文猿臂善射

彎弓三百斤淵爲北單于立爲右賢王及卽大單于位更

拜鹿蠡王 又劉淵傳河瑞二年以聰爲大單于置臺於

平陽西 又聰后呼延氏傳呼延氏武元皇后匈奴中人

淵后之從父妹也有美色恭孝稱于宗族淵后愛聰故以

配焉

素柰花開送武元貫魚同日拜新恩鴻臚密奉求凰詔國豔

全收太保門

十六國春秋前趙錄劉聰傳嘉平二年春正月聰后呼延氏卒諡曰武元甲戌聰以司空王育尙書令任顗女爲左右昭儀中軍大將軍王彰中書監范隆左僕射馬景女皆爲貴人右僕射朱紀女爲貴妃皆金印紫綬聰將納太保劉殷女太弟父固諫太傅景等曰太保與陛下殊源納之何害聰悅使兼大鴻臚李宏一作恒拜殷二女英娥爲左右貴嬪又納殷女孫四人爲貴人

鷓儀新殿起昭陽永巷抽簪內輔良五夜星沈瓊珮冷李花如雪落虛堂

十六國春秋前趙錄聰后劉氏傳劉氏武宣皇后新興人

十六國書詞卷上 前趙

三

太保劉殷小女名娥字麗華聰將起鷓儀殿于後庭廷尉

陳元達切諫聰大怒將斬之后聞之密遣中常侍私勅左

右停刑於是手疏啓曰今宮室已備無煩更營陛下爲妾

營殿而殺諫臣妾復何面目仰侍中櫛請歸死以塞陛下

誤惑之過聰覽之變色引元達而謝之以后疏示之曰外

輔如公內輔如后朕復何憂 又劉聰傳嘉平三年聰在

逍遙園李中堂劉后手疏切諫聰怒乃解引元達而謝之

易李中堂爲愧賢堂四年春正月流星起于牽牛入紫微

龍形逶迤其光照地落于平陽視之則有肉長三十步廣

二十七步肉旁常有哭聲癸未劉后產一蛇一虎各害人

而走尋之不見頃之見在隕肉之旁己丑劉后卒乃失此

肉哭聲亦止

玉鏡臺成賜六宮官家親為臉傳紅小劉佳麗傾椒掖却把
蘭簪換柘弓

劉義慶世說劉聰為玉鏡臺 十六國春秋前趙錄劉聰

傳聰假懷帝儀同三司封會稽郡公引帝入讌從容謂帝

曰卿昔為豫章王時贈朕柘弓銀研卿頗記否帝曰臣安

敢忘之但恨爾日不早識龍顏耳聰喜以小劉貴人賜帝

謂帝曰此名公之孫也今特以相妻卿善遇之拜劉為會

稽國夫人 初學記視部引蕭方等三十國春秋曰永嘉六

年劉聰引王入讌上謂曰卿為豫章王時朕與

王武子相造卿贈朕以柘弓銀研卿憶否聰曰安敢忘之

且恨爾日不早識龍顏案是時懷帝以七國壘俘倫延

視息何敢朕已卿聰聰之兒暴又安能容之且自作卑語

乎近世陳氏格致鏡原亦仍三國春秋之懷亟宜辨正

十六國宮詞卷上 前趙

四

蒙珠離國路茫茫幻夢攜歸玉一方見說猗尼迎貴婿暗拋
脂盞蹙啼粧

十六國春秋前趙錄劉聰傳麟嘉二年春二月癸亥東平

王約卒一指猶煖遂不殯殮至于甲戌乃蘇言見淵於不

周山經五日復從至崑崙山三日而復返于不周見諸王

公卿將相死者悉在大有人民宮室壯麗號曰蒙珠離國

淵謂約曰東北有遮須夷國無主久待汝父為之汝父後

三年當來汝且還後年當來約拜謝而歸道遇一國曰猗

尼渠餘國引約入宮與約皮囊一枚曰為吾遺漢皇帝約

辭而歸謂約曰劉郎後年來必見過當以小女相妻約歸

置皮囊于机上俄而蘇活取得開之有一方白玉題文曰

猗尼渠餘國天王敬信遮須夷國天王歲在攝提當相見也馳使奏呈聰曰審如此吾不懼死也

紫光內殿錦幃春羅韞全消洛浦塵知否貞徽彰故國紅閨爭奉義陽神

〔十六國春秋前趙錄〕劉曜傳光初二年曜徙都長安起紫光殿立妃羊氏爲皇后

〔又〕曜后羊氏傳羊氏獻文皇后卽晉惠帝后也洛陽陷遂沒于曜曜僭僞位立爲皇后因問之曰吾何如司馬家兒對曰陛下開基聖主彼亡國暗夫何可竝言

〔在叻述異記〕晉末羣盜蜂起義陽公主自洛中出奔至洛南士卒二千餘人畱守不去以衛京都劉曜攻破之主有殊色曜將逼之主手刃曜不中遂自刃曜

奇其正節遣葬之民憐之爲立廟今義陽神是也

瀉池仙觀轟陵霄二美聯翩大小喬宣進涼州新女伎珠喉唱出玉驄騎

〔資治通鑑〕曜起陵霄觀于瀉池十六國春秋作建凌烟臺于鎬池册府元龜作建陵霄臺于瀉池〔一作凌霄樓〕

〔十六國春秋前趙錄〕曜后劉氏傳劉氏疾篤曜省之問所欲劉氏泣曰妾叔暄女芳有德色願以備後宮曜許之

〔又〕曜后劉氏傳劉氏名芳先皇后劉氏死曜追念之立爲皇后姿德才色邁於別宮

〔又〕劉曜傳曜西擊涼州張茂稱藩獻女伎二十人

〔又〕陳安傳安死隴上人思之爲作壯士之歌曰隴上健兒曰陳安駭驄駿馬

鐵鍛鞍戰始三交失虵矛棄我駭驄竄巖幽辭多不具載曜聞

而嘉傷命樂府歌之

黑兔蒼鷺紀瑞多侍臣賡美入詩歌君王燕喜嬪嬙笑不道
金神作睡魔

魏書劉曜傳曜得黑兔改年爲太和案十六國春秋曜無太和乃石勒事其年曜爲勒擒未詳孰是震宇記鷺城在清源縣東南晉陽

秋曰永嘉元年洛陽步廣里地陷有蒼鷺飛冲天曜以爲

已瑞築此城以應之十六國春秋前趙錄劉曜傳曜夜

夢三人金面丹脣東向逡巡不言而退旦召公卿已下議

之太史令任義曰金爲兌位物衰落也丹脣不言事之畢也

後趙

石勒據襄國，號稱趙。傅子曰：勒從子虎弒而代之。從鄴傳子世為兄，遵所殺，遵又為虎養孫冉閔。苻弒立其兄鑿，尋弒而代之。改國號曰魏，慕容儁滅之。

鬱鬱彤煙，正殿開風。吹庭燎蠟，成堆黃門。跪進金函，表貢使新從女國來。

趙畫石勒造燎高十丈，上盤置燎，下盤安人，以燎絙繳上。

十六國春秋以此為石虎事。

十六國春秋後趙錄石勒傳魏烈帝

立未親政事，太后臨朝，遣使與勒通和。時人謂之女國使。

妙簡三英，與九華蘭儀。婉婉出良家中，宮寶劍明秋水。不割

君王繫臂紗。

十六國春秋後趙錄石勒傳定昭儀夫人位，視上公貴嬪。

貴人視列侯，員各一人。三英九華視伯，淑媛淑儀視子容。

十六國宮詞卷上

後趙

七

華美人視男，務簡賢淑，不限員數。又勒后劉氏傳張裨

反於襄城，后拔劍斬之。勒賴后而濟，有呂氏輔漢之風。然

性不如忌，尤過之也。

布穀聲中，迓屬車青縑袴褶。賁新會三推已畢，三縑舉梓苑

春深理綠簾。

趙書裴憲撰三正東耕儀，中書令徐光奏請親耕，改服青

縑袴褶。

十六國春秋徐光傳作光春耕。縑青縑袴褶，宜從趙書為長。

十六國春秋後

趙錄石勒傳立桑梓苑于襄國。

鄴中記鄴城西三里桑梓苑，有宮臨漳水。凡此諸宮

皆有夫人侍婢，又苑有苑園，養獐鹿雉兔虎，數遊宴于其中。案鄴城桑梓苑，蓋仿襄國為之。但虎視勒，雖事增華耳。

大宛重譯，達名都白疊。黃瑤異寶，輸盡道胭脂顏色好。可能

紅似女珊瑚。

趙書石勒建平二年大宛獻珊瑚琉璃毼毼白疊

龍岡寂寞太妃墳長樂鐘聲不復聞愁絕日斜西閣後一杯
食作兩匙分

寰宇記石勒母王夫人家在龍岡縣之西南 十六國春

秋後趙錄勒母王氏傳初勒被鬻于平原與王氏相失晉

劉琨得之及勒貴後琨遣使送于勒劉聰僭位拜勒為上

黨公進封王氏為上黨國太夫人未幾病死潛窆山谷莫

知其所後備九命之禮虛葬于襄國 十六國春秋鈔勒

薨于西閣 王隱晉書石勒時有謠云一杯食分兩匙石

勒死人不知

熠熠丹袍坐玉牀沈沈黃猛作天王綠綈錦筒盛元璽金鸞

十六國書詞卷上 後趙

八

銜書下鳳陽

十六國春秋後趙錄石虎傳建武二年虎于正會殿上施

白玉牀臨軒大會著丹紗袍 說郭引鄴中記作碧紗袍
御覽引鄴中記作丹紗袍

陶穀清異錄石虎時避諱號虎為黃猛 十六國春秋後

趙錄石虎傳建武元年虎稱居攝趙天王 趙明誠金石錄
趙橫山李君神

碑題建武六年歲在庚子三月己亥二十一日癸丑按晉
書帝紀石虎以咸和九年自立為趙天王而載記云咸康

元年僭稱居攝趙天王據帝紀則建武六年歲在己亥據
載記則歲在庚子宋苞公紀年通譜獨以本年紀為據今此

碑及西門豹祠殿基記並六年建皆云歲在庚子以此三
知帝紀之失非二碑則晉紀與載記得失不復可考矣

年稱大趙天王 又織錦羅在中尚方三署錦或青綈或

白綈或黃綈或綠綈或紫綈或蜀綈工巧百數不可盡名

又武鄉長城徙人韓強獲元玉璽方四寸七分龜鈕金

文詣鄴獻之拜強騎都尉

太平御覽引石虎別傳曰武鄉縣民得元璽一方四寸厚二寸

與璽同文曰受命于天既壽永昌可補崔書璽文之闕

又虎有詔書以五色紙着

鳳凰口中鳳旣銜詔侍人放數百丈緋繩轆轤迴轉狀若

飛翔飛下端門鳳以木作之五色文身脚皆用金

又鄴

宮南面三門西鳳陽門高二十五丈向陽安金鳳凰二頭

于其上鎮之其頭高一丈六尺

永經注鄴城有七門南

曰鳳陽門中曰中陽門次曰廣陽門東曰建春門北曰廣

德門次曰廐門西曰金明門一曰白門

元日崑華設大朝碧窗朱幌列羣僚鹿幡影靜蛟鐘闕百隊珠衣舞細腰

陸翽鄴中記虎大會禮樂旣陳虎繳兩閣上窗幌宮人數

十六國宮詞卷上

後趙

九

千陪列著坐悉服飾金銀熠熠又於閣上作女伎數百衣

皆絡以珠璣鼓舞連倒

說郛引此條作連到

琴瑟細伎畢備

又石

虎太武殿西有崑華殿閣上輒開大窗皆絳紗幌

又西

臺高六十七丈上作銅鳳牕皆銅龍疏雲母幌日之初出

乃流光照耀

十六國春秋後趙錄石勒傳勒爲虎名故

改稱白虎幡爲天鹿幡

又石虎傳銅鐘四枚如鐸形或

作蛟龍或作鳥獸繞其上

蜡臘明禋雜戲陳彩幢簇擁五仙人侍臣探著頭籌絹博得

君王一笑春

鄴中記石虎以辰日臘子日記祖于殿庭立五仙人高數

丈五采幢蓋大會羣臣于太武殿上使各三探乃有得絹

百疋者有得數十疋者有得一二疋者虎輒大笑以爲樂
金花洲上碧堂高鳴鶴舟輕泛翠濤千朵杜鵑萬條柳十分
顏色讓櫻桃

〔寰宇記〕華林園石季龍築凌雲城金花洲光碧堂飛雲殿
御宿堂五迴路薜蘿蕪島杜若洲貧人村皆在華林苑中

〔又〕石虎有鳴鶴飛龍等舟 〔十六國春秋〕後趙錄石虎傳

太子宣害秦公韜虎殺之廢其母杜氏爲庶人貴嬪柳氏
尙書者之女也坐其二兄有寵于宣亦殺之虎追念其姿

色復納者少女于芳林園 〔晉載記〕勒爲季龍娉將軍郭

榮妹爲妻季龍寵惑優僮鄭櫻桃而殺郭氏更納清河崔

氏女櫻桃又譖而殺之 十六國春秋以櫻桃爲鄭后名與此異其譖殺崔郭事則與此同

十六國宮詞卷上 後趙

彪澗浮橋度彩虹峩峩金帽大王雄紫巾女騎腰肢瘦巧挽
雌黃宛轉弓

〔左思魏都賦〕龍山虎澗 〔鄴乘〕虎澗俗曰彪澗在縣西三

十里野馬岡下 〔安陽縣志〕虎澗因避石虎諱更名彪澗

〔鄴城故事〕紫陌浮橋在城西北五里案鄴中記云石虎

時于此濟置紫陌宮 〔蕭方等三十國春秋〕石季龍將獵

輒冠金縷之帽 〔鄴中記〕季龍獵著金縷織成合歡帽

〔十六國春秋〕後趙錄石虎傳虎與皇后出常以女騎一千

爲鹵簿冬日皆著紫綸巾織熟錦袴腰中皆著金銀縷帶

手持雌黃宛轉角弓 〔陸龜蒙鄴宮詞〕曉日靚粧千騎女

白櫻桃下紫綸巾

鐵梁穿井闢天廚豪飫恩濃屬國趨銀帶遊槃陳玉饌桃瓢餅樣做搏鑑

〔鄴中記〕石虎于銅雀臺下穿二井作鐵梁地道以通井

上亦見十六國春秋已下無之又于井中多置財寶飲食以悅蕃客曰聖

井〔十六國春秋後趙錄〕石虎傳虎正會上御食遊槃兩

重皆金銀參帶百二十酸彫飾竝同其參帶之間菜莢畫

微如破髮近看乃見動遊帶則員轉也〔太平御覽〕引趙

錄石虎好食蒸餅常以乾棗胡桃瓢爲心蒸之使坼裂方

食今後趙錄無之又石勒名餅爲搏鑑今後趙錄無之

涼馬臺前苜蓿秋羽林七萃洗洹流朱衣妙伎瑯鞍立釵脚

書成躍紫騮

十六國宮詞卷上

後趙

七

〔鄴中記〕涼馬臺高三十尺周迴五百步後趙石虎所築建

武六年虎都鄴洗馬于洹水築此臺以涼馬故名十六國春秋虎

造梁馬臺一名笑馬臺一名戲馬臺一名閼馬臺在城中漳水之南未知卽此臺否然梁馬於義難通當係涼馬之

說也〔鄴中記〕石虎有馬妓著朱衣進賢冠立于馬上馬走

而作書字皆端正

瑜堤香水引溫泉琥珀瓶開竝蒂蓮攀得長生王母樹瑤池

浴罷小遊仙

〔十六國春秋後趙錄〕石虎傳有四時浴室皆用瑜石

鑄珽玦爲堤岸以琥珀車渠爲瓶杓夏則引外溝水以納

于池池中皆以紗縠爲囊盛百雜香漬于水底嚴冰之時

作銅屈龍數千枚各重數十斤燒如火色投于水中則池

拾遺記作

水恒温引浴室中名曰燠龍温池又用文錦步障縈蔽浴所與宮人寵嬖者解媠服宴戲彌于日夜名曰清熿浴室浴罷洩水于宮外水流之所名温香渠渠外之人爭來汲取得升合以歸其家人莫不怡悅浴室中種二長生樹枝條交于棟上團團作車蓋形冬日不凋葉大如掌至八九月乃生花花色白子赤大如橡子不中啖也世人謂之西王母長生樹

蟬鬢釵垂倚畫欄陳妃侍宴酒初闌大官重進金盤果白馬甜榴心齒寒

十六國春秋後趙錄陳氏傳陳氏別駕陳逵之妹也才色甚美髮長七尺虎甚嬖之遂以爲夫人寵冠後宮 又石

十六國宮詞卷上 後趙

三

勒傳華林苑中種名果奇花民間有名果虎作蝦蟆車四圍掘根面去一丈深一丈合土載之植之無不生有西王母棗三子一尺勾鼻桃重二斤半春李冬花春熟安石榴子大如椀盞其味不酸 鄴中記白馬之村出好石榴其大如斗其甜如蜜人有得者不自食交相餽送語曰白馬甜榴一實值牛

九龍噴水沃都梁女伴持花獻梵王聞道儲君乘醉入盡迴鸞袖避蘭房

十六國春秋後趙錄石虎傳四月八日九龍銜水浴太子之像 范亨燕書文明紀咸康四年四月石虎至燕城下會鄴使至云太子遂在後恣酒入宮殺害石主大恐狼狽

引還又初帳下吳胄使鄴還說四月浴佛日行像詣宮
石太子邃騎出迎像往來馳騁無有儲君體王曰古者觀
威儀以定禍福此子虎之副貳而輕佻無禮將不得其死
案十六國春秋虎殺邃在
晉成康三年與燕書異

勅發金錢建鄴祠巧工營構儷般倂碩章獸共舒淒雀異物
摹形上玉碑

十六國春秋後趙錄石勒傳勒鑄豐貨錢杜氏通典豐
貨錢徑一寸重四銖代人謂之富錢藏之令人豐富也

馬氏通考豐貨錢梁初猶行之代謂之男錢婦人佩之則
生男也案杜馬二說不同洪遵泉志曰舊譜曰豐貨錢徑
一寸重四銖文曰豐貨世人謂之富錢言收此令入
豐富余案此錢徑九分重三銖輪深好潤面文有豐貨二
字篆書昇案洪志所說銖寸雖與通典小異富錢之義則

十六國宣詞卷上

後趙

三

同梁時所行向有布泉名男錢馬氏以豐貨錢當之恐悞
又稗史彙編曰天福鎮寶錢鏤有黎字晉氏舊史以為後
趙石勒所鑄案天福乃石晉年號董道謂當時所鑄有天
福鎮寶錢亦云見晉氏舊史今是書不可得見然此錢猶
有存者其銅質字體與石晉之天福元寶規制相同恐非
六朝時物又說郭載董道錢譜引董道錢譜曰石氏日錢
重四銖懸針書日其為石趙為石晉道
書殘闕莫得而詳附載于此以俟博攷

永經注漳水東
逕西門豹祠前東側有碑隱起為字祠堂東頭勒銘曰趙
建武所修也金石錄趙西門豹祠殿基記云建武六年

歲在庚子秋八月庚寅造西門祠殿基又云巧工司馬臣

張由監作吏臣杜波馬孫殿中司馬臣王基殿中都尉臣

潘倪侍御史騎都尉臣劉諠左校令臣趙升殿中校尉臣

顏零等監其下刻物象甚多如土長強良碩章獸舒淒雀

之類其名頗異近歲臨淄縣人耕地得巧工司馬印遍尋

史傳皆無此官名不知為何代物今乃見于此碑云

十旬嬌女掌中珠仙艾難求稚蕙枯諸母原無嘗藥職却緣
謠詠便張弧

趙書石虎聘崔氏為夫人無寵所愛鄭夫人有百日女病

謂崔悞與藥以告虎作威問之崔言外舍小子以少唾其

容作祟案此句文義難解疑有闕誤非藥也後石即虎也趙書以勒為前石虎為後石

射之一箭通中而死十六國春秋作鄭氏生男崔求養鄭不許一月猝病死鄭讓崔謂妾多養

羯子虎大怒射殺之與此異

女官終日判鉛黃玉案文書檢校忙却羨玳樓諸姊妹同心

結子縮香囊

鄴中記石虎以宮人為女官門下通事以玉案行文書

十六國宮詞卷上 後趙

尚

十六國春秋後趙錄石虎傳建玳瑁樓懸五色珠簾白玉

為鈎帶內有瑜石床以玳瑁為龜甲文鋪以十色錦繡故

名玳瑁樓又虎作流蘇帳鄴中記流蘇染鳥翎為之帳頂安金蓮花

花中懸金薄織成純囊裹受三升以沉香注帳之四面上

有十二香囊彩色亦同

趙平新郡改鶉觚貴主何曾念故都別有貂璫輪夜直偷垂

玉筋濕羅襦

周地圖記鶉觚縣石趙建武十年改為趙平郡案鶉觚乃安定屬縣

前為劉曜所有十六國春秋後趙錄石虎傳初虎之破上邽也

張豺獲劉曜幼女安定公主有殊色納于虎虎嬖之生子

世以為皇后鄴中記石虎征討所得婦女美色萬餘選

爲女侍中著貂璫直皇后案太平寰宇記載此條云又據侍中絀言皆貂璫直侍其官人有才藝者爲女尚書八座文與此詳略互異並錄之

九雛飛去鵠潛形金鎖難羈彩鳳翎慈指彈棋剛半局拋零玉子散春星

〔二〕石僞事石昆降說鄴中有鳳皇將九雛在延明門外道

西〔十六國春秋後趙錄〕石虎傳揚州獻黃鵠雛五頸長

一丈聲聞十餘里泛之于元武池中俄化爲龜〔鄴中記〕

鳳陽門樓安金鳳皇二頭石虎將衰一頭飛入漳河會晴

日見于水中一頭以鐵釘釘足今存〔寰宇記〕鳳陽門上

有鳳二枚其一飛入漳水其一仍以鎖絆其足鄴人舊歌

曰鳳陽門南天一半上有金鳳相飛喚欲去不去著鎖絆

十六國宮詞卷上 後趙

五

〔十六國春秋後趙錄〕石遵傳再閔使將軍蘇彥周成率

甲士三千人執遵于南臺如意觀遵方與婦人彈碁問成

等曰反者誰也成曰義陽王鑒當立遵曰我尙如是汝等

立鑒復能幾時遂殺之

前燕

慕容廆據棘城晉拜廆平州牧封遼東公廆子皝徙龍城稱燕王皝子儁自龍城徙薊復徙鄴僭號稱帝傳子皝苻堅滅之

福宿芒垂紫野長乾羅襦鎧易冠裳龍驤節下分狼眊音喜見中朝有謝郎

燕書初晉室大亂高祖慕容廆方經畧江東高翔說高祖曰

自王公政錯士人失望襁負歸公者動有萬數今王氏敗

沒而福宿見尾箕其兆可見也今晉室雖衰自此已下畧同十六國春秋

秋人心未變宜遣貢使江東示有所尊然後仗義聲以掃

不庭可以有辭于天下高祖深納焉十六國春秋前燕

錄慕容廆傳慕容廆鮮卑人也昔高辛氏遊于海濱留少

子厥次以君北夷邑于紫濛之野秦漢之際為匈奴所敗

十六國宮詞卷上前燕

六

保鮮卑山因以為號述異記乾羅十六國春秋作乾歸者慕容廆

之十一世祖也見神著金銀襦鎧一本無見神二字恐非乘白馬金

銀鞍勒自天而下鮮卑神之推為君長已上並同十六國春秋干

六國春秋慕容廆傳曾祖莫護跋時燕代少年多冠步搖

冠跋見而好之乃斂髮襲冠諸部因呼之為步搖其後音

訛為慕容父涉歸漸變舊風自云慕二儀之德繼三光之

容即以慕容為姓元帝即尊位授廆龍驤將軍天平御

覽引俗說謝安小兒時便有名譽流聞遠國慕容廆餉謝

白狼眊一雙謝時年十三

紫團參共碧餒餉遠載瑤筐聘上都底事繡鞵纖手製也隨

方物一齊輸

太平御覽慕容皝北史作晃與顧和書曰今致人參十斤麻黃

五斤餺飥十斤繡鞵一輛十六國春秋作遺侍中顧和繡鞵一輛餘物不載

絳幡朱鋤音誦又音策白花菱遍敷南琛總未奇却愛雙文黃竹

簞琉璃瑩滑稱冰肌

太平御覽庾翼與慕容皝書曰今致孔雀毼二枚細練十

端竹練二十端繡鎧一領兜牟白毼自副朱漆鋤二十張

絳碧畫旛黑毼自副白甌二枚北堂書鈔庾翼與燕王

書曰今致丈二細桃枝簞十黃篋雙文簞二王獨受黃篋

雙文簞一枚

興平公主嫁平城漠漠黃沙跨鳳行且喜交婚重結好琵琶

聲引瑟琴聲

十六國春秋卷上前燕

十六國春秋前燕錄慕容皝傳咸康五年魏昭成帝遣使

求婚皝以其妹興平公主妻之又建元二年皝遣使奉

聘求交婚于魏昭成以烈帝女妻之

青翰舟迴鬪鴨池重溫繡被定無期紅藍鍊就燕支色莫道

君王總未知

十六國春秋前燕錄張鴻傳鴻仕皝為黃門郎甚寵愛之

鴻頤下忽生鬚三根長寸餘皝由是不悅乃遣出宮使看

鸞鳴太平御覽習鑿齒與燕王書曰山下有紅藍足下

先知之否北方人採取其花染緋黃接其上英者作燕支

婦人用為顏色可愛

八月秋山百卉腓風毛雨血合重圍朱衣白馬恩恩去赭駿

長嘶傍輦歸

十六國春秋前燕錄慕容皝傳咸康七年皝使唐國內史陽裕等築龍城八年遷都龍城

又燕十五年秋七月皝

敗于西鄙將濟河見一父老乘白馬

晉載記父老下有服朱衣三字

舉手

麾皝曰此非獵所王宜還也秘之不言遂濟河連日大獲

八月皝復見白兔馳馬射之馬倒墜于石上被傷乃說所

見輦而還宮遂有疾未幾疾甚九月薨于承乾殿

案王隱晉書慕容

容就田于南鄙見父老曰此非獵所王宜還也既明日又出見白兔馳射之墜馬于石即死與此異

又慕容

容儁傳初廐有駿馬曰赭白有奇相逸力石虎來攻皝將

出避難欲乘之馬悲鳴踞齧人莫能近乃止虎尋奔退皝

益奇之

盧龍山石勒銘開赤水形鹽進御來夾道甘棠紅爛漫詞臣

獻頌集鄒枚

水經注燕景昭慕容儁遣將軍步渾洽盧龍塞道焚山刊石

令通方軌勒石嶺上以記事功 九州記樂壽縣有房淵

方三百里石勒建安二年

案十六國春秋石勒年號有建平無建安

水忽變為

赤燕慕容儁陶宏景刀劍錄儁作俊二年水忽生鹽如卵形其淵一

日再長再滅不失其度居近者時見龍狗之狀戲于旁葉

落于淵者輒有羣燕銜出 十六國春秋前燕錄慕容儁

傳儁觀兵近郊見甘棠于道周從者不識儁曰唏此詩所

謂甘棠於道甘者味之主也木者春之行也五德屬仁五

行主土以施生味以養物色又赤者言將有赫赫之慶於

中土吾謂國家之盛此其徵也傳曰升高能賦可以爲大夫羣司亦各書其志吾得覽焉於是內外臣僚竝上甘棠頌

珍禽翬翟殿西椒奉璽君來玉珮搖肅拜丹墀呼萬歲天教黃霧鎖南朝

十六國春秋前燕錄慕容儁傳元璽元年鶯巢于正陽殿之西椒生三雛頂上有監毛凡城獻異鳥五色成章儁謂羣臣曰是何祥也咸稱鶯者燕鳥也首有毛冠者言大燕龍興冠通天冕章甫之象也巢正陽西椒者言至尊臨軒朝萬國之徵也三子者數應三統之驗也神鳥五色言聖朝將繼五行之錄以御四海者也儁大悅秋八月魏長水

十六國宮詞卷上 前燕

五

校尉馬願等開郡城納燕兵送冉閔妻董氏等并乘輿服物及六璽於薊傳國璽蔣幹先已送晉儁欲神其事業言

璽數在已乃詐云閔妻得之以獻賜號曰奉璽君 燕書

元璽六年 案十六國春秋燕慕容儁元璽六年二月改元光壽是時冉閔之滅已久不應有閔臣蔣幹求

救之事六字疑誤蔣幹遣太子詹事劉猗齎傳國璽詣晉求救猗

負璽行數里天黃霧四塞不得進易行璽始得去 案此乃燕人之

飾說正十六國春秋所謂欲神其事業言璽數在已者也

噬嗑陳爻問列卿雀臺高宴樂昇平春風吹醒蒲池酒緜嶺

蕭蕭鶴背笙

燕書烈祖 慕容儁常從容問諸侍臣曰夫口以下動乃能制

物鐵鑽爲用亦噬嗑之義而從上下何也申弼答曰口之

下動上使下也鐵鑽之用上斬下也烈祖稱善 十六國
春秋前燕錄慕容儁傳光壽元年徙都於鄴繕修宮殿復
作銅雀臺三年春三月譙羣臣于蒲池酒酣賦詩因談經
史論及周太子晉潸然流涕顧謂羣臣曰昔魏武追痛倉
舒孫權悼登無已孤常謂二主無大雅之體才子難得自
景先之亡已來孤鬢髮中白始知二主有以而然也
暈翟傳家可足渾不聞壺德協蘋蘩鄴宮湘女驂鸞去忍見
紅粧出國門

十六國春秋前燕錄景昭可足渾氏傳儁后可足渾氏尙
書令豫章公翼之從姊也儁元璽二年立爲皇后曄嗣位
尊爲皇太后頗預朝政性尤猜忌 又慕容曄傳建熙十

十六國宮詞卷上 前燕

三

年立貴妃可足渾氏爲皇后渾氏太后從弟翼女也 魏

書慕容曄傳有神降于鄴自稱湘女 十六國春秋作相女 有聲與人

款接數日而去 十六國春秋前燕錄慕容曄傳建熙十

一年夏六月秦苻堅復來伐冬十二月堅入鄴宮徙后妃
已下于長安

前秦

苻健據長安僭號稱秦傳子生健從子堅弒而代之寇晉敗歸為姚萇所弒子丕立于晉陽兵敗為姚

五節菖蒲苗玉塘雞閭寶氣耀金方咸池浴日虹光現赤篆
先呈草付祥

十六國春秋前秦錄苻洪傳始其家池中生蒲長五丈五

節狀如竹時咸異之謂之蒲家 又苻堅傳初堅卽位新

平王彫陳說圖識 王彫車頻秦書作金彫 曰新平地古顓頊之墟里

名曰雞閭記言此里應出古帝王寶器其名曰延壽寶鼎

顓頊有云河上先生為吾隱之子咸陽西北吾之子孫有

草付臣又土應之至是而新平人耕地得之以獻器銘篆

書文題之法一為天王二為皇后三為三公四為諸侯五

十六國宮詞卷上 前秦

三

為伯子男六為卿大夫七為元士自此已下考載文記列

帝王名臣自天子三后 晉載記作王后 内外次序上應天文象紫

宮布列依玉牒版辭不違帝王之數從上元人皇起至中

元窮于下元天地一變盡三元而止 又堅母苻氏嘗遊

漳水祈子于西門豹祠歸其夜夢與神交因而有孕十二

月而生堅背有赤文隱起狀如篆文成字曰草付臣又土

王咸陽 軍頻秦書苻堅母苻氏浴漳水經西門豹祠夜

夢若有龍蛇感已遂懷孕而生堅 又堅背文曰草付之

祥因為苻氏

五華燈樹煥螭膏香靄氤氲雉扇高捲上珠簾齊拜舞毳裘

君長換宮袍

秦故事五華燈樹正月朔朝賀設于下三階之前月照星明雖夜猶晝。裴景仁前秦記苻健皇始四年山雉來入人家棲宿養子而去羣聚傍渭水而游翔與家雞無異。

十六國春秋前秦錄苻堅傳建元十六年懸珠簾于太極前殿以朝羣臣十八年車師前部王彌寘鄯善王休密馱。長安志作林密馱入朝堅賜以朝服引見西堂。

鬻魏黃雲麗絳霄大酺五日奏仙韶徽音堂裏春光早內宴筵開簇翠翹。

秦書苻堅立有黃雲五色迴繞臺觀時以為瑞。見藝文類聚賜民酺五日。見太平御覽苻敏求長安志徽音堂在惡犬城外。

苻氏造也。

十六國宮詞卷上 前秦

三

璇宮星度市南垣太史窺璣報九閭阿監中宵傳蠟炬翟車迎到濯龍門。

十六國春秋前秦錄堅太后苟氏傳陽平公融太后少子也甚愛之出鎮冀州比發三至灞上其夕又竊如融所內外莫知是夜堅寢於前殿太史令魏延上言天市南門屏內后妃星失明左右閭寺不見后妃移動之象堅推問之驚曰天道與人何其不遠遂重星官。

野蠶作繭瀚休徵柘館筐鈎禮數增月竈何須陳火布長秋杼柚斂西陵。

十六國春秋前秦錄苻健傳皇始元年野蠶成繭百姓採野繭而衣家給人足。又苻堅傳甘露元年二月皇后苟

氏親蠶于南郊
又建元十七年天竺獻火浣布

西園冠蓋集三臺暫輟龍樓問豎來遙祝兩宮千萬壽吉金彫像禮高禩

王宋汝帖鄴祠柱刻秦像銘云神熊鑿口鸞鳳羣飛千秋萬歲宛轉岡頤鐵顛開山騰龍能伯遮峙瞻儲末云大秦皇太子仰爲皇帝陛下暨中宮殿下鑿石彫金作像一身永資聖壽命中庶子臣蕭雍銘之安陽縣志鄴祠柱秦像銘前秦太子苻宏爲其父苻堅母苟氏所刻也堅母苟氏祈子于西門豹祠歸而有孕十二月而生堅有神光之異自天燭於庭西門祠有高禩之祥宜其刻銘像于祠柱也十六國春秋云永興元年册妃苟氏爲皇后世子宏爲

十六國宮詞卷上

前秦

三

皇太子則所謂中宮者苟氏所稱太子者宏也後十三年爲堅建元六年十一月王猛始滅燕堅乃得有鄴地鑿石刻銘當在是時矣銘辭殊不可解似不止此二十八字以王宋刻汝帖止節取數字不顧文義東觀餘論已譏之不必強爲之解也惟此銘旣摹入汝帖則宣和時其石尙存好古者訪而求之俾不銷蝕于叩火磨角之中亦大快事也

樓寒萬里進夷光綠鬢雲垂七寶牀莫望東瀛思故國美人端合住西方

秦書苻堅建元十八年新羅國王樓寒遣使衛頭獻美女

國在百濟東其人多美髮長丈餘十六國春秋畧同惟無國王及使臣名又

事繫建元十七年與此小異

又苻堅時新羅國王樓寒遣使衛頭朝

貢堅問之曰卿言海東之事與古異何也答曰亦猶中國時代變革年號改易

山花迎輦月舒波玉鏡金絲盛綺羅遙憶禁城鐘漏永一灣渭水隔天河

富平縣志明月山南有頰山一名玉鏡山一名金絲山兩傍峪如兩門卽古土門山也山巔之陽鑿其半東西二百步南北半之世傳秦苻堅作離宮于此

曲讌逍遙選妙辭中涓援軫咏仇緩掖庭縱有知書女誰解蘇娘錦字詩

十六國春秋前秦錄朱彤傳堅宴羣臣于逍遙園令文官

十六國宮詞卷上

前秦

詩

賦詩有洛陽少年者長不滿四尺而聰博善屬文因彤上逍遙戲馬賦堅覽而奇之曰此文綺藻清麗長卿儔也

又趙整傳整無鬚而瘦時人謂爲閹性好幾諫因侍宴援琴而歌曰阿得脂阿得脂博勞舊父通鑑作舅父是仇緩尾長

翼短不能飛遠徙種人留鮮卑一旦緩急語阿誰堅笑而不納又苻堅傳後宮置典學立內司以教掖庭選女隸

敏慧者詣博士授經唐武曌織錦回文記前秦苻堅時

秦州刺史扶風竇滔妻蘇氏陳留令武功道質弟三女也名蕙字若蘭識智精明儀容秀麗謙默自守不求顯揚行

年十六歸於竇氏滔甚敬之然蘇性近於急頗傷妒嫉滔字連波右將軍真之孫朗之弟二子也丰神秀偉該通經

史允文允武時論高之苻堅委以心膂之任備歷顯職皆有政聞遷秦州刺史忤旨調戍燉煌會堅寇晉襄陵慮有危逼藉滔才畧迺拜安南將軍留鎮襄陽焉初滔有寵姬趙陽臺歌舞之妙無出其右滔置之別所蘇氏知之求而獲之苦加捶辱滔深以爲恨陽臺又伺蘇氏之短譖毀交至滔益忿焉蘇氏時二十一滔將鎮襄陽邀其同往蘇氏怨之不與偕行滔攜陽臺之任斷其音問蘇氏悔恨自傷因織錦回文五采相宣瑩心耀目縱廣八寸題詩二百餘首計入百餘言縱橫反覆皆成章句其文點畫無缺才情之妙超古邁今名曰璇璣圖然讀者不能盡通蘇氏笑而謂人曰徘徊宛轉自成文章匪我佳人莫之能解遂發蒼

十六國宮詞卷上

前秦

垂

頭齋致襄陽焉滔省覽錦字感其妙絕因諭陽臺令謝愆而具車徒盛禮邀迎蘇氏歸于漢南恩好愈篤蘇氏著文詞五千餘言屬隋季喪亂文章散落追求不獲而錦字回

文盛見傳寫是近代閨怨之宗旨屬文之士咸龜鏡焉朕聽政之暇留心墳典散帙之次偶見此圖因述若蘭之才

美寶滔之悔過遂製此記聊以示將來也

案十六國春秋寶滔妻蘇氏傳

但言滔爲秦州刺史被徙流沙蘇氏思之因織錦爲回文之說
晉書蘇氏傳亦然與武氏所記不同今以詩意考之武氏爲近

金穗垂垂黼帳低紫宮深處暖香迷趙家姊妹休相擬插竹

分桃各笑啼

十六國春秋前秦錄苻堅傳初堅之滅燕慕容冲姊清河

公主年十四有殊色堅納之寵冠後庭冲年十三晉載記作十二

亦有龍陽之姿堅又幸之姊弟專寵宮人莫進長安歌之

曰一雌復一雄雙飛入紫宮

殿前金井轆轤沈未必君恩似此深翠羽秋風零落盡雀來

燕室又何心

戴延之西征記苻秦築宮于長安東城中有大極殿殿上

有金井金博山金轆轤交龍負山于井上有金獅子在龍

下秦書苻堅時西域獻翠鳥四頭雌雄各二籠盛之月

餘竝死干六國春秋前秦錄趙整傳建元中慕容垂夫

人段氏得幸於堅堅與之同輦遊於後庭整作歌以諷之

日不見雀來入燕室但見浮雲蔽白日堅改容謝之命夫

人下輦

十六國宮詞卷上 前秦

美

閱世金人劫運多垂成霸業竟蹉跎夢回風露秋葵冷又見

虞兮泣楚歌

水經注石虎取金人置鄴宮苻堅又徙之長安毀其二爲

錢其一未至苻堅亂百姓推置陝北河中寰宇記秦始

皇鑄金人十二董卓毀其九爲錢其在者三石氏取置鄴

宮至苻堅徙長安其一未至而苻氏亂百姓推置陝北河

中干六國春秋前秦錄堅夫人張氏傳堅將入寇江左

羣臣切諫不聽張氏進曰妾聞王者出師必上觀天道下

順人心今人心旣不然矣請驗之天道諺云鷄夜鳴者不

利行師犬羣嗥者宮室必空兵動馬驚軍敗不歸自秋冬

已來衆雞夜鳴羣犬哀嗥鹿馬驚逸武庫兵器自動有聲
此皆非出師之祥也願陛下思之堅曰軍旅之事非婦人
所當豫也遂與兵張氏請從其夜堅夢葵生城內明以問
之張氏曰若征軍遠行難爲將也夢書作苜堅將欲南伐
夢滿城出菜占日菜多
難爲醬也堅又夢地東南傾復以問云江左不可平也夢書君
同無南行必敗之象也堅不從果大敗於壽春單騎遁還顧
張氏潛然流涕及堅死張氏乃自殺

璿墓空分若木華王孫芳草渺天涯盈盈寶錦年三五纔學
吹簫月已斜

寰宇記什邡縣洛通山有祠古老傳云苻堅有子避難死
于洛通山因立祠 十六國春秋前秦錄苻堅傳建元二

十六國宮詞卷上 前秦

七

十一年夏五月慕容冲帥衆攻長安六月堅與張夫人及
中山公詵幼女寶錦出奔五將山秋七月姚萇執堅以歸
八月堅罵萇求死謂張夫人曰豈可使羌奴辱吾兒乃先
殺寶錦

金繩宛轉縮青銅 粧鏡倉皇出鄴宮 莫道魚羊能雪耻 輸他
巾幗有英雄

十六國春秋前秦錄苻堅傳慕容垂攻鄴苻丕請救于謝
元並遺元以青銅鏡黃金宛轉繩爲信 又初堅強盛時

有謠曰魚羊田升當滅秦魚羊鮮也田升卑也言滅秦者
鮮卑也 又丕后楊氏傳慕容永據長子卽位將以楊氏
爲上夫人楊氏不從引劍刺永爲永所殺秦燕亡妃主俘
辱秦亡則不然

故詩
及之
又登后毛氏傳毛氏美而勇壯善騎射姚萇率兵
襲之營壘既陷毛氏猶彎弓跨馬率壯士與萇交戰殺賊
七百餘人衆寡不敵為萇所執萇欲納之毛氏罵曰天子
皇后安肯為賊羌所辱何不速殺我因仰天大哭萇怒殺
之

十六國宮詞卷上

前秦

三

後燕

慕容垂據中山臂號稱燕傳子寶魏師深入北奔龍城爲爾汗所弑子盛誅汗卽位段璣作亂被傷死叔父熙立馮跋弑之立寶養子高雲尋爲幸臣難班桃仁所弑馮跋討賊定亂遂代之

金光夙映尾箕芒鐘簾重新撫翼方往日艱難悲故劍元妃繼美在椒房

初學記引霍鴻後燕錄董統上言于慕容垂曰臣聞陛下

之奇有六焉厥初之奇金光耀室案今本十六國春秋後燕錄無之 十

六國春秋後燕錄垂后先段氏傳垂爲吳王時立爲王妃

段氏才高性烈自以貴姓不尊事太后可足渾氏渾氏銜

之偶又素不平於垂中常侍涅皓希旨告段氏爲巫蠱欲

以連污垂遂收段氏下大長秋廷尉考治段氏志氣確然

終無撓辭拷掠甚急垂愍之私使人謂段氏曰人生會當

十六國宮詞卷上 後燕 完

一死何堪楚毒如此不若引服段氏嘆曰吾豈愛死者耶

若自誣以惡逆上辱祖宗下累於王固不爲也辨答益明

故垂得以免禍而段氏竟死獄中及垂卽位追諡曰成昭

皇后 又垂后後段氏傳段氏字元妃光祿大夫段儀之

女也少而婉慧有節操嘗謂其妹季妃曰我終不作凡人

妻季妃曰妹亦不作庸人婦隣人聞而笑之內黃人張定

善相見儀二女大驚曰君家大興當由二女儀深異之既

而垂納元妃爲繼室遂有殊寵及卽位册拜爲皇后范陽

王慕容德亦聘季妃姊妹皆爲皇后卒如其言

隔城宮觀起中山粉堞參差黑水環遮莫御溝通石竇不流

紅葉到人間

水經注盧奴城內西北隅有黑水池池水東北隅有漢中山王故宮處臺殿觀榭皆上國之制簡王尊貴壯麗有加始築兩宮開四門穿北城累石爲寶通池流于城中造魚池釣臺戲馬之觀歲久頽毀遺基尙存暨趙石建武七年遣北中郎將始築小城興起北榭立宮造殿後燕因其故宮建都中山更築隔城興復宮觀今府榭猶傳故制自漢及燕池水逕石寶

壓紐恩慈屬道符昭儀誇耀掌中珠若非長樂能光復白雀知誰屋上烏

十六國春秋後燕錄寶后段氏傳初爲昭儀生子策字道符策於諸子中最少寶甚寵愛之封濮陽公年十二美姿

十六國宮詞卷上

後燕

三

貌而蠢愚不慧恃寶冢嗣未定欲立太子而垂屬意于清河公會寶意不在會猶豫未決庶長子長樂公盛潛知之稱策堪爲儲貳寶遂立策爲太子立段氏爲皇后又慕

容盛傳寶爲蘭汗所殺盛攻汗殺之告成於太廟卽位于承乾殿長樂元年夏四月有異雀素身綠首集于端門棲

翔東園二旬而去以異雀故大赦殊死已下改東園爲白

雀園

藝文類聚祥瑞部引燕書曰愍帝時有異雀素質綠首集于端門東樹棲翔二旬而去夏四月以異雀故大赦名東園白雀昇案愍帝者慕容寶也然寶嗣服之初已遭拓跋之難流離奔竄終殞厥軀盛宏濟艱難光復舊物觀其初政美矣君哉異雀之瑞固當爲盛不爲寶也通鑑晉隆安三年當燕長樂元年是年夏四月燕大赦證之十六國春秋亦合

足正燕書之誤

蘭如濟變內夫家象服酬庸之六珈千古雍姬翻舊案何人

彤史定瑜瑕

十六國春秋後燕錄盛妃蘭氏傳蘭氏尙書頓邱王蘭汗之女也寶爲汗所殺盛馳進赴哀汗妻乙氏及盛妃皆涕泣請盛于汗妃復頓頭于諸兄弟汗惻然哀之遣其子迎盛舍于宮中親待如舊先是汗之當國也盛從寶出亡妃奉事丁氏丁氏盛伯父獻莊太子全之妃愈謹及盛誅汗以妃當從坐欲殺之丁氏以妃有保全之功固爭之得免然終不得爲后

又慕容盛傳汗欲誅盛先引見察之盛妃知之密告盛於是僞稱疾篤不復出入汗亦止不殺李旱等與盛潛結大謀盛夜踰牆入于東宮與李旱等攻汗斬之

二苻同載七香車縮袖齊攀陌上花左部珍符陳紫壁芳名

留取刻茗華

十六國宮詞卷上 後燕

十六國春秋後燕錄熙昭儀大苻氏傳大苻氏故中山尹苻謨之長女也名曰娥娥納爲貴人未幾進爲昭儀苻氏美而豔好微行游宴熙弗之禁也 又熙后小苻氏傳小

苻氏謨幼女也名曰訓英納爲貴嬪寵愛踰于其姊尋立爲皇后后好遊田熙從之北登白鹿山東過青嶺南臨滄

海百姓苦之 晉書載記二苻俱好微行 燕書昭文蔡

諡帝時左部民得紫壁以獻

景雲山映曲光瀾新起承華玉殿寬夜半風鈴驚夢覺白龍

飛去月光寒

十六國春秋後燕錄慕容熙傳大築龍騰苑起景雲山于

苑內又鑿曲光海清涼池 又熙后小苻氏傳熙爲苻后
起承華殿高承光一倍 又慕容熙傳太史丞梁延年夢
月化爲五白龍夢中占之曰月臣也龍君也月化爲龍當
有臣爲君者寤而告人曰國符其將盡乎

十六國宮詞卷上

後漢

壹

十六國宮詞卷下

南通州周 昇蓉初撰并註

後秦

姚萇據長安僭號稱秦
傳子興孫泓劉裕滅之

全家西上渡河汾
鄜杏關山起陣雲
惆悵天桃花落後
九龍寨裏鏡鷺分

〔十六國春秋後秦錄姚襄傳〕晉升平元年春三月襄徙北
屈將圖關中夏四月自北屈進屯杏城遣從兄蘭略地鄜
城襄進據黃落秦苻生遣苻黃眉苻道龍苻堅鄧羌帥騎
要之襄長驅進擊戰于三原敗績為苻堅所殺時年二十
七〔耀州志〕魏王樓姚襄所建今故址猶有四望石山如
屏障然樓南有襄教軍場萇僭號追諡襄為魏武王至今

十六國宮詞卷下

後秦

稱魏王樓云三木門與天桃諸堡九龍寨皆其跡九龍寨
尚有寨門地牢相傳魏王立屯三百六十日宴一屯給人
馬食歲一周此其一也〔西安府志〕天活堡在耀州西北
四面石厓峻絕上有薪水可守蓋魏王姚襄所營今游者
往往得遺鏃折戟或銅錢古鏡等物

七曲山前選貴神鹿鳴
芩野樂嘉賓他年麋苑
徒蕃育豐草詩名屬諫臣

寰宇記

濟順王本張惡子晉人戰死而廟存〔郡國志〕云惡

子昔至長安見姚萇謂曰却後九年君當入蜀若至梓潼
七曲山幸當見尋至建元十二年隨楊安南伐未至七曲
山迷路遊騎賈君蒙忽見一鹿馳逐至廟門鹿自死追騎

共剝之有頃葺至悟曰此是張君爲我設主客之禮烹食

而去案十六國春秋姚萇傳曰萇爲左衛將軍總攝安伐

君乎萇請其姓名曰張惡人謂之曰君早還秦無主其在

其地立張相公廟祠之與寰宇記所載互異又案梓潼化

書曰子往關中與姚萇爲友然厭處凡世思歸蜀峯約萇

曰苟富貴無相忘後萇以龍驤將軍使蜀訪子子禮待之

假以鐵如意視之曰麾之可致兵萇疑子爲之一揮戈

盾戎馬萬餘列之平坡今試兵塢是也與寰宇記及十六

國春秋所載又各

不同錄備參考

有麋子苑羌王養麋鹿數百頭十六國春秋後秦錄姚

興傳興雅好遊吹京兆杜延著豐草詩箴之興覽而善之

賜以金帛終弗能改

鳳遊樓閣暖融融册晉昭儀掌六宮春殿駢生連理樹內官

稱賀緣牋通

十六國宮詞卷下 後秦

十六國春秋後秦錄姚萇傳起殿于役初故城西北鳳游

鄉上 又姚興后張氏傳張氏美容儀有淑德初進爲昭

儀興甚寵之立爲皇后 又姚興傳連理樹生于廟庭

續晉陽秋姚略 案十六國春秋興字子略好書有綠紙赤軸

豔說金登祖澤遙嬋娟鬪草集蘭茗須彌嘉卉都搜盡覓到

春城蓮勺 音輦苗

王嘉拾遺記晉武帝爲撫軍時府內後堂砌下忽生異草

三株莖黃葉綠狀如金蒼有羌人姓姚名馥字世芬充廐

養馬妙解陰陽之術云此草以名金德之瑞馥年九十歲

卽姚襄祖也馥好讀書嗜酒每醉歷月不醒羣輩呼爲渴

羌及晉武踐位擢朝歌長馥辭曰馬圍老羌漸染皇教今

者歡酒池之樂受朝歌之地更爲殷紂之比乎帝撫玉几
大悅卽遷爲酒泉太守其地有清泉其味如酒馥乘酒而
拜之遂爲善政民爲立生祠案十六國春秋姚氏世爲羌
酋燒當雄於洮罕之間當七
世孫填虞徙出塞北虞九世孫遷那內附處於南安赤亭
那元孫柯迴爲魏征西將軍以功假西羌都督迴生弋仲
弋仲有子四十二人襄第五襄第二十四然十六國春
秋後秦錄姚興傳作須彌山四面有崇巖峻壁珍禽異獸
山林草木精奇怪異人所未識寰宇記古蓮勺城在今
下邳縣北二十五里蓮勺以草爲名案地道記云蓮勺縣
屬馮翊後秦姚萇廢

西平公主遠和親漫把金人難玉人間說白樓思故國掖庭
紅淚共沾巾

十六國宮詞卷下 後秦

三

十六國春秋後秦錄姚興傳遣散騎常侍姚敞等送女西
平公主于魏太宗以后禮納之鑄金人不咸乃以爲夫人
而寵遇甚厚寰宇記朔州有白樓郡國志云後魏納姚
氏爲后悲思故國造此樓登望飾以鉛粉故名云

花開淨土現優曇波若誰人妙解參却與紅塵留法種掃眉
宮女侍蓮龕

明一統志淨土樹在鄠縣南三月開花如桃花八月結實
狀如小粟殼中皆黃土俗傳鳩摩羅什憇此覆其履土所
生西征記嶽音殿西南姚興起波若臺十六國春秋

後秦錄姚興傳興託意于佛沙門自遠至造浮屠于永貴
里立波若臺于中宮又鳩摩羅什傳羅什一日忽下高

座謂興曰有二小兒登吾肩慾障須婦人興曰大師聰明
超悟海內無雙若一旦後世何可使法種無嗣遂以宮女
進之一交而生二子諸僧有效之者什聚針盈鉢謂之曰
若能相效食此者可畜室耳因舉七進針與常食不別
諸僧愧止

東藩樂伎度函嶠鳳舞鸞歌換錦巢譜出黃兒新曲調葭笛
黍尺細推敲

〔十六國春秋後秦錄姚興傳〕宏始九年慕容超獻大樂伎
一百二十人又姚邕傳邕小字黃兒興之弟也封濟南
公識鑒明慧尤善音樂皆能度其盈虛增改曲調世咸傳
之號濟南新調

十六國宮詞卷下

後秦

四

匏瓜星動韭花多無復金鸞浴洛波青史至今憐後帝餐松
可得學秦娥

〔十六國春秋後秦錄姚興傳〕先是熒惑在匏瓜中忽亡不
知所在後八十餘日出東井畱守勾已久之乃去間一歲
而秦亡後秦書姚興種蔥皆化爲韭其後兵戈日盛業

十六國春秋姚興傳宏始三年逍遙園有蔥變爲菑咸
以爲美瑞興令占之曰當有智人來入中國與此異

〔幽

明錄〕晉義熙中羌主姚略壞洛陽陰溝取磚得一雙鸞竝
金色交頸長鳴聲聞九臯秦記後帝泓字元時東宮生

邵宏言於父曰君之于臣先生之于門人名之可也至於
同官之于僚黨同姓之于昆弟同門之于朋友可以稱其
字而不可斥其名故公羊傳曰名不如字者非謂其人之

名不如其字尊乃謂爲人所字則近乎見尊爲人所名則近乎見卑也古之君子之名子也必以信義而擇淑令所以祥其名也不以官職所以殊其名也不以畜幣所以重其名也不以隱疾所以顯其名也通告內外所以昭其名也書而藏之所以寶其名也賤者避焉所以貴其名也冠而有字所以尊其名也名藏乎禮字依乎名名字之本字名之末也爲本故尊爲末故卑尊故其禮詳卑故其事略也且婦人無名故賤於丈夫野人無名故賤於學士名者已之所以事尊尊者之所以命已字則已之所以接卑卑者之所以稱已未有用之于尊而爲卑用之于卑而爲尊者也

案十六國春秋姚泓字元子不載邵宏語

十六國春秋後秦錄姚泓傳

十六國宮詞卷下

後秦

五

永和二年秋七月泓出奔石橋晉師圍之泓欲降泓子佛念年十二謂泓曰陛下今雖降晉晉人將逞其欲終必不全願自裁決泓憮然不答佛念遂登宮牆自投而死八月泓降九月劉裕至長安送泓于建康市而戮之

太平廣記引逸史曰

唐太宗年有禪師道行精高居于南岳忽一日見一物人行而來緣毛覆體師驚問之其物合掌而言曰今是何代僧曰大唐也又曰和尚知晉末乎自爾至是凡幾載僧曰從晉及今向四百年矣其物乃曰和尚博古知今豈不知有姚泓乎僧曰知之物曰我即泓也僧曰吾覽晉史言泓斬于建康市泓則死矣何至今日子復稱爲姚泓耶泓曰當時裕送我于建康市以徇天下未及肆刑我乃脫身逃匿裕求我不得遂假一人貌類我者斬之以立威聲耳我自逃遁山野遠涉此峯餐松柏葉年深代遠遍身生此緣毛已得長生之道矣僧曰倉峯何至歲久體生碧毛秦宮人遭亂避世入太華之峯餌其松栢歲久體生碧毛尺餘或逢世人自驚異至今謂之毛女峯上人豈不聞乎僧因請須所食泓言吾不食世間之味久矣惟飲茶一甌既而辭僧告去竟不復見案此說近誕錄之以廣異聞

南燕慕容德據廣固僭號稱燕立兄子超爲太子德死超卽位劉裕滅之

燕德文成赤璽符五州疆索鞏黃圖金刀依舊來張掖不見
萱花返故都

王景暉南燕書姚秦皇初三年歲在丁酉于長安渭濱得

赤璽上有文字曰天命燕德案十六國春秋亦載此條准不言皇初何年事又璽文每

德字故舍晉書地理志南燕以并州牧鎮陰平幽州刺

史鎮發于徐州刺史鎮莒城兗州刺史鎮梁父青州刺史

鎮東萊所謂五州也十六國春秋南燕錄慕容超傳超

備德案錄載慕容德建平二年詔憫吏民犯諱增一備字爲二名兄北海王納之子也

納與母公孫氏就備德家于張掖備德從苻堅南征留金

刀別母而去備德與燕王垂起兵于山東張掖太守收納

十六國宮詞卷下 南燕 六

及備德諸子皆誅之公孫氏以老獲免納妻段氏以懷娠

未決囚之于郡獄獄掾呼延平備德之故吏也嘗有死罪

備德免之竊將公孫氏及段氏逃于羌中段氏生超年十

歲而公孫氏病臨死授超以金刀曰聞汝伯已中興于鄴

都吾朽病將沒相見理絕若天下太平汝得東歸當以此

刀還汝伯也呼延平文將超母子奔于吕光及吕隆降秦

超隨涼州民徙于長安未幾平卒超號慟經旬超母謂之

曰吾母子得全濟者呼延氏之力也平今雖死吾欲爲汝

納其女以答厚恩於是娶之超潛變姓名歸至廣固呈金

刀具宣祖母臨終之言備德撫之號慟

瑤姬清淚濕香羅裙帶書成冷翠蛾黯黯琴囊塵掩綠壽光

駙馬病愁多

十六國春秋南燕錄慕容氏傳段豐妻慕容氏德之女也
少有才慧善書史能鼓琴德既僭位署爲平原公主年十
四適于豐豐爲人所譖被殺慕容氏寡居歸將改適壽光
公餘熾慕容氏謂侍婢曰我聞忠臣不事二君烈女不更
二夫段氏旣遭無辜已不能同死豈復有心於重行哉今
主上不顧禮義逼我改嫁我若不從則違嚴君之命矣於
是尅日交禮慕容氏姿容婉麗服飾光華熾觀之甚喜經
宿慕容氏僞辭以疾熾亦不之逼三日歸第沐浴置酒言
笑自若至夕密書其裙帶曰死後當埋我於段氏側若魂
魄有知當歸彼矣遂於浴室自縊而死及葬男女觀者數

十六國詞卷下

南燕

七

萬人莫不歎息曰貞哉公主路經餘熾宅前熾聞輓歌之
聲慟絕良久案慕容氏之死是也待成禮而後死非也女
守一醮父命不義固不可從奈何以未亡人
被盛服而行嘉禮乎
斯恩孝之害貞也

玉樹風儀異域還東陽殿上集鸚鵡班兩宮無恙如嬪喜鈿輦
迎歸馬耳關

十六國春秋南燕錄慕容超傳先是超自長安行至梁父
南海王法時爲兗州刺史鎮南長史悅壽謂法曰向見北
海王子天資宏雅神爽高邁始知天族多奇玉林皆寶

又超朝會羣臣於東陽殿 又超以母妻先在長安爲姚
興所拘質遣使奉表稱藩并送大樂伎一百二十人興大
悅還超母妻厚其資禮而遣之超親率六宮迎之于馬耳

關

〔通典〕劉裕執慕容超獲金鈿輦

十六國春秋作金鈿輦

綠熊珍革錦鞍裝千里驂驢貢樂浪

音洛

底事兗州纔薦女

玉峯明鏡忽韜光

〔十六國春秋〕南燕錄慕容超傳太上二年高句驪遣使獻

千里馬生熊皮障泥于超超大悅答以水牛能言鳥太上

四年兗州人王滿獻美女 〔酉陽雜俎〕濟南郡方山有明

鏡石方三丈南燕時鏡上遂漆焉俗言山神惡其照物故

漆之

獵車連日出郊珂赤獸何來顯異形輪與扁舟漁父樂呼鷺

夜半掣金鈴

〔十六國春秋〕南燕錄慕容超傳超不恤政事惟畋遊是好

〔十六國宮詞〕卷下

南燕

八

太上四年祀于南郊將登壇有獸大如馬狀類鼠而色赤

集于園邱之側俄而不知所在 〔酉陽雜俎〕濟南郡張公

城西北有鶯溝南燕世有漁人居水側常聽鶯聲而衆鶯

中有鈴聲甚清亮候之見一鶯咽頸極長因羅得之項上

有銅鈴綴以銀鑲有隱起元鼎元年字

風吹女水碧粼粼石犬聲中起戰塵九萬貔貅齊解甲傾城

休怨魏夫人

〔述〕征記臨淄牛山下有女水

十六國春秋作汝水

齊人諺曰世治則

女水流世亂則女水竭慕容超時乾涸彌載及宋武北征

而激洪流

十六國春秋但言水涸不言復流

〔承〕經注女水或云齊桓公

女冢在其上故以名水也化隆則水生政薄則津竭燕建

平六年水忽暴竭元明惡之寢疾而亡燕太上四年女水
又竭慕容超惡之燕祚遂淪郡國志宋武帝伐南燕至
吠狗山夜聞狗吠明日視之見石狗千六國春秋南燕
錄慕容超傳太上五年夏六月劉裕師次東莞超遣左將
軍段暉等將步騎五萬進據臨朐既聞晉軍之盛大懼自
率步騎四萬就暉等于臨朐裕縱兵奮擊暉衆大敗超奔
還廣固裕築長圍守之太上六年春正月超幸姬魏夫人
從超登城見晉師之盛方奏樂乃握超手而相對泣曲終
不已

夏

赫連勃勃據統萬僭號稱夏傳子昌為魏所禽弟定復自立于平涼吐谷渾助魏滅之

朝游涼殿暮温宮靈沼華林入望中百尺樓頭紅袖倚真珠
瑟瑟落天風

十六國春秋夏錄胡義周傳勃勃作統萬城義周為銘頌

其功德曰華林靈沼崇臺祕室又曰温宮膠葛涼殿崢嶸

辭多不具載

寰宇記真珠樓通天樓皆勃勃建在朔方城內

砥平馳道出雄關白口驢城校獵還嶺北河南巡幸徧翠華

移蹕契吳山

延安府志聖人道在保安縣東七里赫連勃勃起自夏臺

入長安芟平山谷開此道 永經注薄骨律鎮城在河渚

上赫連果城也桑果餘林仍列洲上

案元和郡縣志赫連勃勃所置果園今桃

十六國宮詞卷下

夏

十

李千餘株鬱然猶在

但語出戎方不究城名所自訪諸耆舊云赫連

之世有駿馬死此取馬色以為邑號故曰城為白口驢韻

之謬遂仍今稱所未詳也

段龜龍涼州記契吳山在縣

北七十里赫連勃勃北游契吳而歎曰美哉斯阜臨廣澤

而帶青海吾行地多矣自嶺已北大河已南未有若斯之

壯麗矣

新築金城百雉崇輜駟留駐起居同一揮龍劍三秦定賀表

先陳太后宮

元和郡縣志偽夏太后城在洛交縣南三十六里勃勃自

將兵入長安留太后築城以居之

十六國春秋夏錄赫

連勃勃傳鳳翔元年

水經注作龍昇七年案十六國春秋是年春三月改元鳳翔然則龍昇七

年卽鳳翔元年也造百鍊剛刀五口背上爲龍雀大環兼以金鏤

作一龍形長三尺九寸號曰大夏龍雀銘其背曰古之利

器吳楚湛盧大夏龍雀名冠神都可以懷遠可以柔邇如

風靡草威服九域案水經注邇作逋域作區當從之以崔書所載于韻不諧也又昌

武元年勃勃入長安

涿蓮池畔泛蘭舟紅頰吳兒發棹謳飲罷甘泉新進酒萬魚

噴雨芰荷秋

寰宇記涿蓮池十六國春秋作涿蓮池在靈州赫連勃勃每畋于三

交涿蓮池又吳兒城在廢龍泉縣西北四十里赫連勃

勃破劉裕子義真于長安遂虜其人築此城以居之又

故甘泉城在下邳縣西南四十里以此地水多鹹苦城中

十六國宮詞卷下

井泉甘美遂名甘泉亦謂之夏王城俗傳赫連勃勃所築

十六國春秋夏錄赫連勃勃傳真興二年雨魚于統萬

法燈炯炯照迷途曇始辛勤象教扶古塔空闢修黑寶不知

世有白浮圖

十六國春秋夏錄赫連勃勃傳勃勃旣破關中斬戮無數

時有沙門曇始魏書釋老志作惠始亦遇其害而刃不能傷勃勃異

之遂赦沙門寧夏府志海寶塔在振武門外三里舊志

名黑寶塔云赫連勃勃重修延安府志白浮圖寺在延

川縣南六十里寺前七冢相傳赫連勃勃葬此十六國春秋夏錄勃

勃葬嘉平陵元和郡縣志勃勃墓在朔方縣西二十五里

太平御覽引十六國春秋夏錄赫連昌發二百里內民二

萬五千人整嘉平陵七千人繕清廟于契吳以勃平昔之意也故立廟焉葬勃于城西十五里起行宮模寫統萬宮

殿飾以金銀珠璣葬訖焚之殺駿馬數十匹舂棘木六國案諸書皆言勃勃葬于朔方當在今寧夏府邊境不應在延安今姑存以備一說又案太平寰宇記赫連勃勃墓在雀邑縣東二十里霍山最高峯上與元和郡縣志諸書均不合考勃勃置并州鎮蒲坂則霍山或當在夏境惟舍都邑而遠葬邊鄙理不應爾或其所置疑豕乎姑附于此以俟再考

佛狸牽得藕絲裙乍出金箱散麝薰瓊樹三枝齊折取淚珠誰似薛靈芸

十六國春秋夏錄赫連昌傳承光三年夏四月魏世祖魏

佛狸伐統萬六月昌出城逆戰大潰不及入城遂奔上

邽魏乘勝追逐至于城北世祖微服逐奔者入其城昌衆覺之諸門悉閉世祖入其宮中得婦人裙繫之槩上乘之而上僅乃得免會日已暮昌尙書僕射問至跋城奉昌母

十六國宮詞卷下

七

出走長孫翰將八千騎追昌不及而還乙巳世祖入城獲昌諸母姊妹妻妾宮人以萬數以昌宮人頒賜將士納勃勃三女爲貴人

前涼

張軌保河西晉拜軌涼州牧傅子實遇弒實弟茂討賊即位傳實子駿駿傳子重華重華傳子靈曜庶兄祚廢而代之僭號稱涼宋混等弒之立重華子元靚復奉晉年號其叔父天錫弒而代之苻堅滅之

龍女珊珊駕水雲珠宮靈匹暫離羣神鸞五色圖新樣繡入

輕緋百褶裙

臨洮府志晉懷帝永嘉五年五月枹罕令嚴根妓產一龍

女涼州牧張軌育之宮中

案十六國春秋前涼錄張軌傳永嘉六年枹罕令嚴羌妾產一

龍一鸞與此異

郡國志涼州昌松縣有鸞鳥城張軌時有五色

鳥集于其處遂築城以美之

魏書涼州染緋甲于天下

圃開元武果成林地近層霄雨露深玉李金桃嘉種夥總輸

桑葚革鴉音

十六國書詞卷下

前涼

三

王隱晉書涼州牧張駿增築四城箱各千步東城植園果

命曰講武場北城植園果命曰元武圃皆有宮殿 十六

國春秋前涼錄張天錫傳會稽王道子問其西土所出何

物為美對曰桑葚甘香鴉鴉革響淳酪養性人無妬心

銅龍池上鏡開奩畫舫輕颺颺翠簾春袂筵闌摘麗藻綠萍

花拂彩毫尖

十六國春秋前涼錄張駿傳閑豫堂前有閑豫池池中有

五龍晝日見彩移時乃滅水通變色遂鑄銅龍於其上

案西

河記曰駿立謙光殿成後池中有五龍晝日見彩移時乃滅水通變綠色駿即為銅龍以厭之駿卒不勝此殿較十六

國春秋為詳

又咸康七年駿作東門行日勾芒遇春正衡紀

運玉瓊明庶起祥風和氣翕來征慶雲蔭八極甘雨潤四

垆昊天降靈澤朝日耀華精嘉苗布原野百卉敷時榮鳩
鵠與鷺黃間關相和鳴葦萍覆靈沼香花揚芳塵春遊誠
可樂感此白日傾休否有終極落葉思本莖臨川悲逝者
節變動中情

株林夜出恣逍遙燕閣鶯闈怨寂寥一自美人來鄴善隔花
愁聽赤瓊簫

十六國春秋前涼錄張駿傳駿常夜出微行姦亂邑里咸

康元年鄴善王元禮晉書張駿傳作元孟獻女姝好號曰美人立賓

遐觀以處之又後涼錄呂纂傳涼州人胡據晉書載記涼州記並

作胡安據盜發張駿墓得赤玉簫

碧綾車盾簇彤騶礮石秋山汗漫游千古名城遺恨在劍鉞

十六國富詞卷下 前涼

十四

割斷柳絲柔

太平御覽謝尚與張涼州書曰今致五尺金斲頭刀一碧

綾車中盾一十六國春秋前涼錄張駿傳建元元年駿

田于建西礮石縣太平御覽引作礮玉石縣秋九月收礮石縣為金澤

縣寰宇記大夏城西二十里有金柳城前涼曾置金劍

縣于此

珠室新成阿母祠携蒲靈蹟竝傳疑不聞青鳥三霄信已報

元龜九日期

十六國春秋前涼錄馬岌傳岌為酒泉太守上言酒泉南

山即崑崙之體也周穆王見西王母樂而忘歸即謂此山

此山上有石室王母堂珠璣鏤飾煥若神宮禹貢崑崙在

臨羌之西卽此明矣宜立西王母祠以裨朝廷無疆之福
駿從之乃爲立祠祀之太平御覽引十六國春秋甘松

山東北二百里有西王母擣菹山大有神驗江水出焉今本

十六國春秋無之十六國春秋前涼錄張駿傳駿有疾夢一龜

向之張口而言曰更九日當有嘉問遂經九日薨

螽斯趨趨本微蟲羽翼潛生永壽宮試看萬秋高閣上鸞刀
血染艾豨紅

十六國春秋前涼錄常據傳重華末年有螽斯蟲集安昌
門外緣壁逆行據因諫曰螽斯是祚小字今乃逆行災之
大者願請出祚以安涼土重華曰子孫繁昌之徵何爲災
也吾昨夢祚攝位方委以周公之事使輔幼子君是何言

十六國宮詞卷下 前涼

也及重華卒祚果殺靈耀又馬氏傳馬氏重華所生母

也美姿儀初爲駿昭儀重華嗣位尊爲王太后居于永壽

宮會重華卒遺命冊拜世子靈耀爲嗣其庶兄長壽侯祚

先與馬氏烝淫乃密說馬氏以靈耀幼冲須立長君馬氏

從之祚遂僭立又張祚傳和平二年祚宗人河州刺史

張瓘起兵傳檄州郡欲廢祚以侯還第復立靈耀宋混等

招合夷晉萬餘人以應瓘進至姑臧瓘弟琚斬西關門納

之混等遂長驅入祚奔入萬秋閣爲廚士徐黑所殺

灑掃泉宮待蜃車枉教青冢葬雙花謙光殿上笙歌散一夜

西風長白瓜

十六國春秋前涼錄閻氏薛氏傳天錫妾閻氏薛氏竝不

知何許人因色竝有殊寵天錫寢疾謂之曰汝二人將何以報我我死之後豈可更爲人妻乎皆曰尊若不諱妾請效死於前供掃灑於地下耳誓無他志也疾篤二姬皆自刎及疾瘳天錫追悼之以夫人禮葬焉

〔又張駿傳〕駿起

謙光殿畫以五色飾以金玉殿之四面各起一殿東曰宜

陽青殿春三月居之南曰朱陽赤殿夏三月居之西曰政

刑

魏書作正德

白殿秋三月居之北曰元武黑殿冬三月居之

〔又張天錫傳〕太元元年秋八月秦兵至姑臧天錫素車

白馬降于軍門初天水太守史稷

三十國春秋作史稷

暴疾而卒五

旬乃蘇

三十國春秋作五日宜從之

云見涼州謙光殿中皆生白瓜至

是秦使中書令梁熙等來伐熙小字白瓜

蜀李雄據成都僭號稱成立兄子班爲太子雄死班立爲雄庶子期所篡雄從子壽又廢而代之改國號曰

漢傳子勢桓溫滋之

門繞雙虹紫氣濃英姿誕降現龜龍艱難慈母金戈裏手摯佳兒作太宗

十六國春秋蜀錄李雄傳雄字仲雋特第三子也母羅氏

夢雙虹自地升天案晉載記作自門升天一虹中斷旣而生蕩後生

雄常言吾二兒若有先亡在者必大貴蕩竟前死雄容貌

魁偉少時有術士相之曰此君將貴其相有四目如重雲

鼻如飛龍太平御覽徧霸部引崔書此條作龜龍蜀李書亦然詩從之口如方器耳如

相望法爲大貴位過三公不疑也又李流傳羅尙攻蕩

雄母羅氏環甲拒戰壯氣益烈又李雄傳雄廟號太宗

十六國詞卷下

七

黃金翠羽飾層城時見鑿輿繞堞行神女送來歡喜雨珠塵

灑地細無聲

西陽雜俎蜀石笋街夏中大雨往往得雜色小珠蜀僧惠

凝曰前史說蜀少城飾以金璧珠翠桓溫惡其太侈焚之

合在此地

魚吹粉水濺粧臺碧檻桃華破臘開頭白宮娥談往事祥鳥

飛去鷓鴣來

十六國春秋蜀錄李期傳玉恒二年天雨大魚于宮中其

色黃又宮中木冬華鷓鴣集于城下華陽國志巴郡有

清水穴巴人以此水爲粉則皜曜鮮芳常貢京師名爲粉

水五行記後蜀李雄玉衡十二年扶風人韓豹爲太史

令雄卒子期立以豹爲太傅猶領舊職豹嘗言于期曰臣
今老志在田園欲植胡桃願賜其種期不悟俄而李壽自
涪率衆南向襲尅成都廢期自立 十六國春秋蜀錄李
雄傳晏平三年有白鳥赤足來翔雄以問范長生長生曰
烏有反哺之義必有遠人懷惠而來者果關中流民相繼
請降藝文類聚鳥部引蜀李書曰武皇帝雄泰成三年白鳥赤足來翔帝以問范賢賢曰烏有反哺之義必有遠人懷惠而來果關中流民請降案賢卽長生也惟泰成晏平與崔書年號互異通鑑考異曰魏書雄傳雄稱帝號大成故三十國春秋誤云改元大成晉載記轉寫誤爲大武雄年號有建興晏平玉衡實無大成大武之號昇按蜀李書之泰成又似因大成轉寫而誤然是書作於常璩璩乃蜀臣所言當非無據錄備參考

一雲鴛鴦散戰船飄零貴主漢江邊紅顏變化知幾早免使他人見亦憐

十六國宮詞卷下

蜀

大

十六國春秋蜀錄李勢傳嘉寶二年晉桓温來伐勢大發軍拒守咎堅等率諸軍自江北鴛鴦碕渡向犍爲温自將步卒直抵成都咎堅至犍爲知與温異道自沙頭津濟比至温已軍于成都之十里陌堅衆自潰勢悉衆出戰温大破之勢降 世說桓宣武平蜀以李勢妹爲妾主温尙晉南康長公主始不知旣聞與數十侍婢拔白刃將襲之正值梳頭髮委地膚色玉曜不爲動容徐曰國破家亡無心至此若能見殺乃其本懷主投刃而抱之曰我見猶憐何況老奴 十六國春秋蜀錄李勢傳先是勢未亡時宮人張氏

有冶容勢寵之一夕化爲蛇復有鄭美人勢亦寵之化爲雌虎未幾而死

後涼

呂光據姑臧僭號稱涼傳子紹庶兄纂弒而代之又為從兄超所弒超奉其兄隆卽位姚興滅之

千斛蒲桃酒似泉摩尼番曲唱樽前龜茲

音邱

公主啼紅濕

鴛寺催開合卷筵

十六國春秋後涼錄呂光傳光討龜茲大敗之入其城國

人奢侈厚於養生家有蒲桃酒或至千斛經十年不敗士

卒淪沒酒藏者相繼因得其樂器有箜篌琵琶五絃笙笛

簫觥篋毛圓鼓都曇鼓答臘鼓腰鼓羯雞婁鼓其歌曲有

善善摩尼解曲婆迦兒舞曲有天殊勒監曲獲天竺沙門

鳩摩羅什強妻以龜茲王女拒而不受光飲以醇酒同開

密室什既被逼遂虧其節

白雀詩成彩筆揮靈泉宴罷醉言歸晴波滉漾祥雲起玉葉

十六國宮詞卷下

後涼

九

金葩繞袞衣

十六國春秋後涼錄呂光傳太安三年白雀巢于陽川令

蓋敏

涼州記作郭敏

屋光下令諸臣為之賦時獻詩及賦者凡百

餘人

甘肅通志靈泉池在武威縣西南後涼呂光嘗宴

羣臣于此

涼州記呂光幸天淵池時天清朗忽然起霧

有五色雲在光上

雄雉高飛念故雌魚軒迎迓到仇池册妃禮畢開家讌先進

同心縹葉梨

十六國春秋後涼錄呂光傳麟嘉元年光妻石氏自仇池

來至姑臧光迎于城東立為王妃讌羣臣于內苑又宋

欽傳欽為燉煌太守以德惠下境內肅清乃結同心之梨

歆詣酒泉獻之光嘉其美瑞賞帛五十匹

濠水旌旗簇仗齊桑田星駕慰黔黎如何舞馬來庭日尙有飛黃憶海西

〔涼記〕涼王呂光麟嘉二年以沮渠羅仇爲西寧太守往年蝗蟲所到之處產子地中是月盡生或一頃二頃覆地跳躍宿昔變異王乃躬臨撲蟲幸揚川濠水北大駕所到蟲尋殄盡是以麥苗損耗無幾

〔涼州記〕呂光麟嘉五年疎勒王獻火浣布善舞馬

〔十六國春秋後涼錄〕呂光傳麟嘉五年春正月初光徙西海郡人于諸郡至是謠曰朔馬心何悲念舊心中勞燕雀何徘徊意欲還故巢頃之遂相扇動復徙之于河西樂都

十六國宮詞卷下

後涼

十

青角門開紫閣寒琳宮幾載怨離鸞隱王地下重相見應悔金經解厄難

〔十六國春秋後涼錄〕呂纂傳纂入自青角門升謙光殿

〔又〕呂紹傳庶兄太原公纂攻紹紹登紫閣自殺追諡隱王

〔又〕紹美人張氏傳張氏燉煌人本隱王紹之美人也清辨有操行姿色莊麗年十四紹見殺便請爲沙門隆見而悅之欲污其行遣中書郎裴敏說之張氏善言明理敏爲之屈隆親逼之張氏斂衽曰欽樂至道故投身空門恐一

且辱于人誓不改節今見逼如此豈非命也於是升門樓

自投于地二踵俱折

涼州記作雙股頓折

口誦佛經顏色自若俄然

而卒

珠箔玲瓏映綺寮
明光歌舞闌嬌嬈
琨華酒醒驚春去
風折楊枝翠欲消

涼州記呂纂明光宮在漸臺西以金玉珠璣爲簾箔

北堂書鈔簾部纂父名光不宜以明光名宮然纂之兒悖固難以理測也十六國春秋後涼

錄呂纂傳番禾太守超光弟右將軍實之子擅擊鮮卑纂召超入朝

怒責之曰卿恃兄弟桓桓乃敢欺吾要當斬卿天下乃定

超頓首曰不敢纂本以恐喝超實無意殺之因引超及諸

臣同讎于內殿超兄中領軍隆屢勸纂酒已至昏醉乘步

輓車將超等遊禁內至琨華堂東閣車不得過纂親將寶

川駱騰倚劍于壁推車過閣超取劍刺纂殺之又纂妻

楊氏傳楊氏美豔有義烈纂爲超所刺楊命禁兵討之殿

十六國宮詞卷下 後涼

中皆其黨與莫有應者將軍魏益多入斬纂首楊氏泣曰

人已死如土石無所復知何忍復殘其形骸乎益多罵之

楊氏與婢十數人殞纂於城西將出宮超恐其挾珍寶出

外使人搜索之楊氏厲聲曰我旦夕死人用金寶何爲超

慚而退又問楊氏玉璽所在楊氏怒曰已毀之矣超見其

有色欲納之謂其父桓三十國春秋作桓曰后若自殺禍及卿宗

桓以言告楊氏楊氏曰大人本賣女與氏以圖富貴一之

已甚其可復使女辱於二氏乎桓不能強遂自殺諡曰穆

后

西秦

乞伏國仁據勇士川稱秦河二州收傳弟乾歸僭稱河南王遷金城尋稱秦王兵敗降姚興尋還國為兄子公府所弒子賊啓討賊即付從抱罕傳子暮末赫連定滅之

抱罕飛橋跨碧波人間亦有銀河西歸重與邊妃見共載

香車緩緩過

秦州記抱罕有河夾岸廣四十丈義熙中乞佛

案沙州記異苑

諸書乞伏並作乞佛

于此河上作飛橋橋高五十丈三年乃就

六國春秋西秦錄邊氏傳乾歸妻邊氏金城人左長史邊

芮之妹也乾歸僭立遂以太初元年立為王后及乾歸奔

降于秦降號太妃既而返國復為王后

頻年宗淑嫁殊方紫塞秋笳道阻長愛女相攸誰可屬畫屏

留待餉瓜郎

十六國宮詞卷下

西秦

三

十六國春秋西秦錄乞伏乾歸傳太初八年禿髮如苟來

降妻以宗女十二年鮮卑疊掘來降以宗女妻之又焦

遺傳遺子華至孝遺曾病甚冬中思食瓜華忽夢人謂之

曰聞爾父思瓜故送助養汝從此進之華跪受席而瓜果

在手香美非常遺食之而病愈乾歸欲以女妻之辭曰凡

娶妻者欲與之共事二親也今以王姬之貴下嫁蓬茅之

士臣懼其闕於中饋非所願也

園林窈窕烏鉤軻珠被瑤環伴豫遊一點金丸纔拂面芙蓉

粉墜絳雲流

十六國春秋西秦錄辛進傳進初為散騎常侍從賊啓遊

于後園凌霄觀進彈飛鳥誤中暮末之母傷其面及暮末

卽位問傷母面之由母以狀告暮末大怒卽日收進殺之
禾黍離離憶舊邦偷生只爲左南降無言有淚何人見春雨
桃花映綠窗

十六國春秋西秦錄秃髮氏傳王后秃髮氏偁檀之女太
子虎臺之妹也偁檀旣降熾磐納爲王后拜偁檀爲左南
公甚禮遇之未幾令人鳩殺偁檀后密與虎臺謀曰秦本
我之仇讐先王之薨又非天命遺令不治者欲全濟子孫
故也爲人子者豈可臣妾於仇讐而不思報復乎乃謀弑
熾磐后妹爲熾磐左夫人有寵知其謀而告之熾磐殺后
及虎臺

休猜簧舌巧爭春却爲琴心自失身寂寂長門金鎖合珮環

聲斷左夫人

十六國宮詞卷下

西秦

五

十六國春秋西秦錄秃髮氏傳左夫人秃髮氏利鹿孤之
宗女也先是熾磐爲質于涼利鹿孤妻之熾磐後奔允街

偁檀復遣歸之遂爲左夫人有寵于熾磐讒殺其姊

昇案

非也以王后秃髮氏傳合觀之姊弟同事一主姊謀私逆
姊知而不言是黨賊也知而言之義之正也烏得爲讒秃
髮氏之罪在于初終改節覆轍相尋若惡其終而
并誣其初非公論也詩首句闕之並申其義于此後秃髮

氏與暮末弟軻殊羅私通暮末知而禁之軻殊羅懼謀殺
暮末使秃髮氏盜門鑰於內鑰悞門不得開門者以告暮

末赦軻殊羅鞭之秃髮氏自殺

鯨鯢駭瞞勢方張剩有丹魚一寸光匪寇更聯婚媾好翩翩

歸妹嫁平昌

十六國春秋西秦錄乞伏暮末傳先是熾磐都長安

此條亦載

異苑案長安非熾磐地無由都之疑有譌字

端門外有一井人常宿汲水亭下

夜聞磕磕有聲驚起照視瓮中如血中有丹魚長可三寸

而有寸光東羌西虜共相攻伐至是而亡

又永宏二年

夏五月河西王蒙遜遣太子興國攻定連六月暮末逆擊

于冶城擒之秋七月蒙遜遣使送穀三十萬斛來贖世子

興國暮末不許以妹平昌公主妻之

南涼

秃髮烏孤據廉川稱西平王尋徙樂都傳弟利鹿孤徙西平傳弟僊檀稱涼王還居樂都秦畀始臧徙都之尋為沮渠蒙遜所逼良還居樂都乞伏熾磐滅之

繡被嬰啼便不凡棣華跗萼迭相銜恩惠一盞朱明酒錦服終須換屬衫

十六國春秋南涼錄秃髮烏孤傳秃髮烏孤河西鮮卑人

其先與魏同出入世祖匹孤匹孤卒子壽闐立初壽闐之

在孕其母夢一老父乘白馬謂已曰爾夫雖西移終當東

返至涼必生貴男言終胎動而寤後因寢而產於被中乃

以秃髮為號其俗謂被覆之義又秃髮利鹿孤傳利鹿

孤烏孤第二弟也烏孤死國人共立之建和元年使弟廣

武公僊檀襲姑臧呂緯固守僊檀置酒朱明門上鳴鐘鼓

十六國宮詞卷下 南涼

五

以饗將士而歸又秃髮僊檀傳僊檀烏孤第三弟也利

鹿孤卒襲位宏昌五年秦主興以為涼州刺史鎮姑臧僊

檀遣史嵩聘秦姚興謂嵩曰車騎坐定涼州衣錦本國其

德我乎拓跋涼記宏昌二年乙弗部獻紫罽衫百二十

領

虎臺高與碧雲齊一覽河湟衆嶺低畢竟英雄能蓋世中宮

恢復舊椒泥

甘肅通志虎臺在西寧府城西五里有臺九層高九丈八

尺相傳南涼王所築一名土臺十六國春秋南涼錄秃

髮僊檀傳嘉平元年秦尚書韋宗來聘退而歎曰車騎神

機秀發信一代之偉人也又僊檀妻折掘氏傳僊檀初

襲位涼王立爲王后既而畏秦人之強乃去年號降稱夫人及僖檀復稱涼王改年嘉平復立爲王后

面試新題擊鉢催綠衣阿監授箋來佳兒賦奏高昌殿禁掖交誇七步才

〔十六國春秋南涼錄禿髮僖檀傳嘉平二年以次子明德歸爲中郎將領昌松太守歸雋爽聰悟僖檀甚寵之年始十三命爲高昌殿賦援筆立成影不移漏僖檀覽而嘉之擬之曹子建

千門屈戌闌金墻一縷冰魂出繡簾多少宮人含淚說重泉何處合雙鎌

〔十六國春秋南涼錄沙門雲霍傳僖檀有女病篤請霍救

十六國詞卷下

南涼

美

療霍曰人之生死自有定期聖人亦不能轉禍爲福吾安能延命耶止可知早晚耳僖檀固請之時後宮門閉霍曰急開後門及開則生不及則死僖檀命開之不及

西涼

李嵩據燉煌稱涼公尋徙酒泉傅子欽為沮渠蒙遜所虜歆弟恂保燉煌蒙遜滅之

虎牙吉語遠相聞珠碧刀銘百勝勳白雀蒼麟親製頌縱難
偃武且修文

劉昞燉煌實錄晉安帝隆安元年涼州牧李嵩微服出城

逢虎道邊虎化為人遙呼嵩為西涼君嵩因彎弧待之又

遙呼嵩曰有事告汝無疑也嵩知其異投弓于地人乃前

曰燉煌空虛不是福地君之子孫王于西涼不如徙酒泉

言訖乃失嵩乃移都酒泉案十六國春秋嵩移都酒泉以沮渠蒙遜非因虎言然劉昞

親為嵩臣所記終當不謬十六國春秋西涼錄李嵩傳嵩造珠碧刀

二口銘其背曰百勝隸書三十國春秋白雀翔于靖恭

嵩頌之十六國春秋載白雀事同惟不言嵩作頌初學記西涼武昭王麒麟

十六國宮詞卷下 西涼

毛

頌曰一角圓蹄行中規矩游必擇地翔而後處不入陷窞

不罹網罟德無不王為之折股

愛女旋歸陟北崖鳴環稚齒慰離懷年年花發辛夷樹瓊藥

誰簪玉燕釵

十六國春秋西涼錄李嵩傳建初二年南涼禿髮傉檀送

嵩女敬愛于酒泉初嵩之立也留女敬愛養于外祖尹文

家文既東遷嵩從姑梁哀之母養之至是傳檀假道于北

山鮮卑使哀送敬愛于酒泉并通和好嵩大悅遣使報聘

又嵩前妻同郡辛納女貞順有婦儀先卒乃自為之誄

尹姑何曾類尹邢西州雅化始宮庭啻啻莫莫休分詠葛藟

繁成鳥翼形

十六國春秋西涼錄高妻尹氏傳尹氏幼而好學清辨有志節爲高繼室高之創業謀謨經略多所贊毘故西州諺曰李尹王燉煌又李高傳甲辰五年夏四月有葛緣木而生作黃鳥之形

靖恭堂對玉池隈曲水金人獻壽杯望斷太虛飛鳳影綠槐風裏下層臺

十六國春秋西涼錄李高傳壬寅三年高于南門外臨水起堂名曰靖恭之堂建初九年春三月上巳高讌于曲水命羣僚賦詩而親爲之序建初十年高著述志賦其辭曰穢鴟鳶之籠嚇欽飛鳳於太清賦長不具錄又初河右不生

楸槐柏漆張駮之世取於秦隴而植之終于皆死至是而

十六國詞卷下 西涼

天

酒泉宮之西北隅有槐樹生焉高著槐樹賦以寄情蓋嘆僻陋遐方立功非所也甘肅通志高臺縣西二十里有古臺基相傳李高所築

北涼

沮渠蒙遜據張掖稱河西王尋徙姑臧傳子茂虔魏滅之

門升南景散金錢虔祝慈闈福壽延莫向新臺窺燕寢當熊人在繡幃前

十六國春秋北涼錄沮渠蒙遜母車氏傳車氏不知何許人以蒙遜元始元年立爲王太后旣而寢疾蒙遜升南景門散錢以賜百姓因下書曰孤庶憑祖廟之靈乾坤之祐濟否剝之運會拯遺黎之毒夢上望掃清氛穢下冀保寧家福而太后不豫涉歲彌增將刑戮有濫衆有怨乎賦役繁重時不堪乎羣望不潔神所譴乎內省諸身未知罪之攸在可大赦殊死以下俄而車氏卒蒙遜哀毀過禮又蒙遜妻王氏傳孟氏武威人以蒙遜元始元年立爲王后

十六國詞卷下

北涼

羌

孟氏有勇力蒙遜寢於新臺闔人王懷祖擊之傷其左足孟氏禽而斬之

連理仙柯茁玉墀遊林讌賞內家隨雀頭黛色齊螺子月給姪娥畫翠眉

十六國春秋北涼錄沮渠蒙遜傳永安

案永安白帖作永和

十年木

連理生永安令張披上書曰異枝同幹遐方有齊化之應殊本同心上下有莫二之固蓋至道之嘉祥大同之美徵也元始六年起遊林堂於內苑承元二年遣使詣朱獻青雀頭黛百斤

金身珠骨厭皈依丈室天花別樣飛學得曼頭陀祕法鴛鍼齊繡紫袈衣

十六國春秋北涼錄沮渠蒙遜傳蒙遜專宏事佛于涼州南百里崖中大造形像千變萬化有土聖僧可如人等常自經行無時暫舍遙見則行人至便止寰宇記劉師祠在酒泉縣南師姓劉名薩訶沮渠時西去求仙回至此死骨化爲珠血化爲丹門人因立廟于此至今人誠心者謁之往往而獲珠丹焉五涼考治六德誌全集劉摩訶北涼時神僧西去沒于酒泉骨化爲珠血化爲丹肅州府志西峯寶寺在肅城西三里神僧傳云沮渠蒙遜僧慧達居武威忽一日云酒泉人有水厄吾當往救寅時發已時至郡正見討來河侵城以手揮之水退隨圓寂瘞骨於此後世遂拓爲寺 十六國春秋北涼錄沮渠蒙遜傳初蜀

十六國宮詞卷下

北涼

五

賓沙門曇無讖東如鄯善自云能使鬼治病且有祕術令婦人多子與鄯善王妹曼頭陀林淫通發覺亡奔涼州蒙遜甚重之號曰聖人蒙遜諸女及子婦皆往受術

大國連姻禮數殊武威嘉耦爵從夫遺簪拋擲關山外春草靡蕪望故都

十六國春秋北涼錄沮渠茂虔

魏書作茂健

妻拓跋氏傳拓跋

氏魏世祖之妹武威公主也茂虔先娶李暠女爲婦永和五年魏以公主妻之茂虔遣右相宋繇奉表詣謝獻馬五百匹黃金五百斤繇又表請公主定號世祖使羣臣議之皆曰妻從夫爵公主於其國內可稱王后於京師可稱公主世祖從之 又西涼錄李暠妻尹氏傳蒙遜娶其女爲

茂虔婦及世祖以妹武威公主妻茂虔尹氏與女遷居酒泉頃之女卒尹氏撫之不哭曰汝國破家亡今死晚矣

十六國宮詞卷下

北涼

三





